

Sikũn Korĩt

Pawre wam Korĩt kãm Jejus kõt hkwỳjê hwỳr kagà nê mênh kõt kagà hõ mênh

Pawre na pre kagàja nhĩpêx. Kêp mry hkà ho ixkre nhĩpêx nê ho wênê ho pa xwỳnh na pre. Tã hpãnhã kêp Jejus nhỹ hã hkrajê jahkre ho pa xwỳnh. Jakamã na pre kagàja nhĩpêx nê Korĩt kãm mē kot Jejus kõt amnhĩ xunhwỳr xwỳnhjê hwỳr kumê. Na pre ra mē hwỳr wamta nhĩpêx nê kumê. Wam kagà nhĩxi pê Wam Korĩt. Tã axte hkõt ja nhĩpêx nê mē hwỳr mênh jakamã kagà nhĩxi pê Sikũn Korĩt.

Na pre Korĩt kãm Jejus kõt mē htõjê hõ axtem nê nã puro kamã hpijaàm kêt o pa nhũm Pawre tee ri harênh ma nê mē hwỳr wam kagàta mē nê kamã tanhmã mē kot hipêx to hã mē kãm karõ. Tã kagà ja kamã axte tanhmã hã mē kãm karõ hto.

Na pre ra Korĩt wỳr mē kêp Kris nhỹ hã mē ahkre hã amnhĩ to hêx xwỳnhjaja mē hwỳr pøj nê tanhmã mē kãm kapêr jarênh to ho mē hkõt pa. Nê tanhmã mē kãm Pawre ho hêx to. Jakamã nhũm kagàja kamã tanhmã mē kãm amnhĩ tã àprãr to nê kãm mē hkĩnh tỳx ã amnhĩ jarê. ã na pre Pawre mē kãm mẽmoj jarênh nê hã kagà anê. Nê mē kãm hã kagà ho:

1 1Pa Korĩt kãm Tĩrtũm krajaja. Xà mē apiitã mē amex na ka mē apa? E ot pa mē awỳr kagà nhĩpêx nê kumê. Mē amã nê mē anhõ pika pê Gres kamã Tĩrtũm krajê mē mē ato ixpimràatã mē awỳr hipêx nê kumê. Ixpê Pawre na pa hte Tĩrtũm jamaxpêr xà hkõt ma Jejus Kris nhỹ hã krĩ piitã hkõt hkrajê jahkre ho ri ixpa. Tã Kris kõt mē pahtõ Ximotre mē wa mē awỳr hipêx nê kumê.

2E kê Měpahpãm Tĩrtũm mē Pahihti Jejus Kris wa mē ato mex rãhã ho pa. Nê mẽmoj to mē akutã nojarêr rãhã ho pa. Ka mē wa kukwak ri ajamakêtkati nê amex nê ri akĩnh nê apa ho apa.

Pawre kãm amnhĩ xà htỳx kamã hamak pyma hkêt ã harênh

Rõmãn 1.11-12; Korosê 1.11; Sikũn Tesarõn 2.16

3-4Nã Tĩrtũm kêp mē panhõ Pahihti Jejus Kris nhĩpêxã na. Nê kêp Měpahpãm maati jakamã na hte mē pakamã ukapri nê tanhmã mē pahto

mex to ho pa. Kot puj mẽ mẽmoj tă tanhmã amnhĩ to nẽ pahkaprĩ nẽ ri papa nhũm ja hã mẽ pahpumu hãmri nẽ hamaxpẽr pix o akupỹm mẽ pahto mẽ paxihtỳx. Mẽmo kaxyw na hte ã mẽ pahto mex anẽ? Nã mẽ pahte amnhĩ tă omunh nẽ amnhĩ pyrãk mẽ hkaprĩ nẽ ri mẽ pa xwỳnhjẽ jamaxpẽr o hihtỳx o mẽ hkõt papa kaxyw. Ja kaxyw na hte mẽ pajamaxpẽr o hihtỳx. Jakamã kwa pu mẽ kãm mex o mex ã mãn harẽnh rãhã ho papa.



Sikũn Korõt 1.3-4

5Na htem tũhã ixto Kris nhĩpẽx pyrã nẽ tanhmã ixto pa amnhĩ xà htỳx kamã ijamak o ri ixpa. Tã nhũm Tĩrtũm inhĩpẽx o te Kris nhĩpẽx pyrã nẽ hamaxpẽr pix o tanhmã ixkrã hto pa mẽ kutã amnhĩ to htỳx nẽ arĩ mẽ hkõt ixpa. 6-7Na pa hte mẽ amã Kris kapẽr jarẽnh o ixpa. Mẽ ate inhmar nẽ hkõt amnhĩ nhĩpẽx kaxyw. Jakamã na hte mẽ kãm Tĩrtũm kapẽr mar prãm kêt xwỳnhjaja tũhã mẽ atã ixtomnuj nẽ pa amnhĩ xà htỳx kamã ijamak o ri ixpa. Tã kwãr mẽ mãmri ã inhĩpẽx anẽ. Mẽ ate Jejus kõt amnhĩ xunhwỳr tỳxja na inhmã hprãm. Na htem tanhmã Kris ã inhĩpẽx to nhũm Tĩrtũm mẽ hã ixpumu nẽ tanhmã ixkrã hto pa inhmã amnhĩ xà htỳx kamã ijamak pyma hkêt nẽ ixpa. Nẽ arĩ mẽ hkõt mẽ kãm kapẽr jarẽnh rãhã ho ri ixpa. Na hte Tĩrtũm amarĩ ã inhĩpẽx anhỳr kêt nẽ. Mẽ ate ã kot inhĩpẽx anhỳr ã ixpumunh nẽ ixpyrã nẽ amnhĩ kaxyw kãm ajamaxpẽr tỳx kaxyw na hte ã inhĩpẽx anẽ. Mẽ ate ja hã ixpumunh nẽ ã ajamaxpẽr anhỳr kaxyw nẽ mẽ ajamaxpẽr o:

— Nã kot pa nhỹrmã Pawre pyrã nẽ tũhã mẽ mỳrapẽ amnhĩ xà htỳx kamã ijamak o ixpa. Hãmri nhũm Tĩrtũm ja hã ixpumu nẽ te ho Pawre nhĩpẽx pyrã nẽ tanhmã ixto pa inhmã amnhĩ xà htỳx kamã ijamak pyma hkêt nẽ ixpa. Nã koja ã inhĩpẽx anẽ.

Anhỳr o mẽ ajamaxpẽr kaxyw na hte Tĩrtũm mẽ kutã ixto ixihtỳx. Mẽ ate ja hã ixpumunh nẽ akupỹm tãm ajamaxpẽr pẽ Karõ nhỹ hã amnhĩ to axihtỳx kaxyw. Jakamã na pa tee ri mẽ akukamã ijamaxpẽr kêt nẽ.

Tĩrtũm kẽp mẽ papytãr xwỳnh ã harẽnh

8E Kris kõt ixkwỳjaja. Kot paj ixprĩ hã mẽ amã tanhmã amnhĩ jarẽnh to ka mẽ inhma. Na pa pre ma pika pẽ As wỳr mũ nẽ mẽ kãm Jejus kapẽr jarẽnh o ri mẽ hkõt ixpa. Hãmri nhũm mẽ hkwỳjaja ja hã ixtomnuj tỳx nẽ pa amnhĩ xà htỳx kamã ijamak pẽ mẽ hkõt ixpa. Kironhỳx pa pre mẽ kamã ty. 9Na pa pre tee ri amnhĩ kukamã ijamaxpẽr o:

—Koja pēr mē ixpī. Tanhmā kot pa we amnhī to nē tokyx mē kēp amnhī pytà? Kot paj tee ri inhmā mē kēp amnhīptār prām. Tīrtūm pix na ja kaxyw mē kutā àhpumunh tỳx. Rỳ nhūm mē kot ixpīr tā nhūm kot akupỹm ixto ixtīr kaxyw tapxipix na àhpumunh tỳx. Nà kot paj amnhī kaxyw tapxipix mǎ mǎn ijamaxpēr o ri ixpa nhūm amnhī tā ixpumu nē hkīnh nē. Ā ixte amnhī nhīpêx anhỹr o ixpaja na kām hprām. Anē.

10Tā nhūm pre ā inhīpêx anē nē xatā mē kēp ixpytār o ixkôt pa. Koja ā mē kēp inhīpêx anhỹr rāhā ho pa. Nà ā kot inhīpêx anhỹr mǎ kēnā.

11Nom kwa kêr ka mē apiitā arī ixto Tīrtūm wỳr rāhā ho ri apa kê mē ama nē mē kām ixkurê xwỳnhjê kutā ixto ixihțỳx rāhā ho pa. Nē ixto mex rāhā nē. Hāmri nhūm mē ohtô nē kot mē kēp tanhmā ixpytār to hā ixtā omu nē ixtā kām mex o mex ā harē.

Pawre kot mē kām amnhī tā aprār ā harēnh

Wam Korīt 2.1-5

12Nē na xep pre atar Kris kôt mē pahkwỳjaja tanhmā ixto kapēr punuj to nē Jejus kot mē awỳr inhmēnh kêt ā mē amā ixto hêx. Nē ijakwa nhīkjê ho inhmā mē akīnh nē ijakwa nhīkjê ho mē ato ixkapēr punuj ā ijarēnh o ri pa. Nom ixte ā amnhī nhīpêx anhỹr kêt. Aa ixte tanhmā mē ano kupyrr to hkêt. Ām hāmri na pa mē amā amnhī jarē nē tām mē amā ixkapēr o ri ixpa nē tām ri mē anhīpêx o ri ixpa. No ijamaxpēr tūm kôt tanhmā mē anhīpêx to hkêt nē. Ām Tīrtūm kot mēmoj to mē pakutā nojarêt ā omunh xà hkôt pix mǎ na pa hte ȳ hā mē ato mex o ri ixpa. Ijamaxpēr nyw o. Na pa hte Tīrtūm pyrā nē mē piitā mē ho mex nē. No mē kajaja ixpyràn mē apê hkra jakamā na pa hte mē ato mex kumrêx o ri ixpa. 13Na pa hte mē amā kagà hkwy nhīpêx nē ixprī hā mē amā tanhmā mēmoj jarēnh to. Mē ate kamā harēnh nē mar mex kurê kumrêx kaxyw. No na pa hte mē amā tanhmā ixêx to rỳ tanhmā mē ano kupyrr to hkêt nē. 14Ā ixte amnhī nhīpêx anhỹr o ri ixpa htā kormā mē apiitā ja hā ixpumunh mex kêt nē. Nē Jejus kot mē awỳr inhmēnh ā ixpumunh mex kêt nē. Jakamā na hte mē akwỳjaja ixto akapēr punuj o pa. Tā kot kaj mē nhỹrmā ām hāmri Jejus kot mē awỳr inhmēnh ā xypên mǎ ijarē pa mē ama nē ixkīnh nē. Hāmri nhūm nhỹrmā mē panhō Pahihti Jejus mē pahwỳr akupỹn wrỳ pa kām mē ajarē nē kām:

—E Pahihti. Jajê mǎ na pa pre akapēr jarēnh o ixpa nhūm mē inhma nē akôt amnhī xunhwỳr kurê kumrêx nē tām amnhī nhīpêx mex o pa.

Anhỹr o kām mē ajarē. Hāmri nē ā mē ate amnhī nhīpêx anhỹr ā mē apumunh kôt ixkīnh nē. Ka mē ajaxwỳja akīnh pê tanhmā kām ijarēnh to ho akuhê.

Pawre hêx kêt ã kot amnhĩ jarênh*Wam Korĩt 16.5-6*

15-16 Nê na pa pre ra mẽ awỳr ixkrà. Ixte ma mẽ awỳr inhmõr nhũm mẽ ate ixpumunh nê akĩnh ã mẽ akamnhĩx nê mẽ awỳr ixkrà nê ijamaxpêr o:

— Nà ma Masetõn wỳr inhmõr xwỳj ri kot paj ma Korĩt kumrêx wỳr mō. Hãmri nê Kris kôt ixkwỳjê pumu nê rĩ kormã hamũ Masetõn wỳr mō. Nê mẽ kamã ri ixpa tãmtã awjanã nê akupỳn Korĩt wỳr mō nê axte mẽ omu. Jao Tĩrtũm kapêr o mẽ ahkre ho axkrut nhũm mẽ amnhĩ tã ixpumu nê hkĩnh nê. Hãmri pa akupỳm Jutej wỳr inhnojarêr nhũm mẽ pry hã ixàpkur xà hã inhmã mẽmoj kwỳ nhõr japêr.

Anhỳr o ijamaxpêr. 17 Tã kormã jar tanhmã amnhĩ nhĩpêx to ho ixpa ka xep mẽ tee ri amnhĩ wỳr ixkãm ama nê axpên mã ijarênh o:

— Kwa Pawre kot ra mẽ pahwỳr nojarêr ã amnhĩ jarênh tã amnhĩm nojarêr kêt kumrêx. Mãn pre ãm mẽ pamã amnhĩ to hêx nà? Ra kot mẽ pamã amnhĩ jarênh tã tokyx hpõx kêtêre hã. Anê.

18 Kwa mẽ ri ã inhmã ajamaxpêr anhỳr kêt nê. Na pa pre mẽ amã ixêx kêt nê. Na pa hte Tĩrtũm noo mã ãm hãmri mẽmoj jarênh o ri ixpa nê mẽ amã mẽmoj jarênh o ixêx kêt nê. Nà ãm hãmri na pa pre ma mẽ awỳr inhmõr ã amnhĩ jarê.

19 Na pa pre ra Ximotre mẽ Siras mẽ wa mẽ amã Jejus Kris jarênh o ri mẽ akôt ixpa. Jejus kêp Tĩrtũm Kra hã harê nê kot amnhĩ nhĩpêx te kot Tĩrtũm kot amnhĩ nhĩpêx pyrãk ã harênh o ri ixpa. Jejus haxwỳja amnhĩ to hêx kêt. Kot mẽmoj tã amnhĩ jarênh xà hkôt na hte ãm hãmri tanhmã amnhĩ nhĩpêx to. Tã ã kot amnhĩ nhĩpêx anhỳrja kôt na pa inhmã ixte amnhĩ nhĩpêx o ixpa hprãm nê. 20 Ra Tĩrtũm Jejus Kris kukwak ri kot mẽ pahto mex ã amnhĩ jarênh jakamã na pu htem axpên mã harênh o:

— Koja Tĩrtũm Jejus kukwak ri mẽ pahto mex rax nê. Ra kot mẽ pahtã amnhĩ jarênh xà hkôt. Nà Tĩrtũm mex o mex. Anê.

Tĩrtũm kot mẽ pa hwỳr Karõ rênh ã harênh*Rômãn 8.14; Epes 1.13*

21 Nà Tĩrtũmja mex o mex. Kot mẽ pahpê hkra kaxyw amnhĩm mẽ paxunhwỳr jakamã na hte tanhmã mẽ pahkrã hto pu mẽ Kris kôt amnhĩ nhĩpêx mex o papa.

22 Na pu htem Kris kôt amnhĩ xunhwỳ nhũm Tĩrtũm ja hã mẽ pahpumu nê mẽ pahwỳr Karõ rê nhũm mẽ pahwỳr agjê. Mẽ piitã mẽ kot mẽ pahpê hkra hã mẽ pahpumunh kaxyw. Te mẽ kot tanhmã mẽ hikukrêx kagã hto nhũm mẽ kot kêp õ dõn ã omunhta pyrãk. Tã koja Tĩrtũm Karõ mẽ pakamã hkrĩ pu mẽ ja hã amnhĩ pumunh kôt Tĩrtũm

kot nhÿrmã mẽ pahto mex rax ã amnhĩ tã omunh kurê kumrêx. Ra kot mẽ pahto mex tã koja nhÿrmã mẽ pahto mex rax o wam kot mẽ pahto mex raxta jakre.

Pawre kãm mẽ kãm àkjêr prãm kêt ã kot amnhĩ jarênh

Wam Korīt 4.21; Sikūn Korīt 10.1-2

23E Kris kôt ixtō nê ixtōxjaja. Kot paj kormã ma mẽ awÿr inhmōr kêt ri ixprĩ hã mẽ amã tanhmã amnhĩ jarênh to ka mẽ ixte amnhĩ jarênh ma. Tĩrtũm tãm mẽ arom kot ijamaxpêr kôt ixpumunh mex jakamã kot paj noo mã ixprĩ hã mẽ amã tanhmã amnhĩ jarênh to ka mẽ inhma.

Na pa pre ra mẽ awÿr inhnojarêt tã no ãm tee ri amnhĩ kukamã ijamaxpêr nê ijamaxpêr o:

—Nà kot paj taxy kormã ma mẽ hwÿr inhmōr kêt nê. Kot paj tokyx mẽ hwÿr mōn pōj nê kot amnhĩ tomnuj xwÿnhta ã mẽ kãm akir nê nê tanhmã mẽ kãm ixkapêr to. Hãmri nhũm mẽ amnhĩ tã inhma nê hkaprĩ nê tee ri amnhĩ kukamã hamaxpêr. ã mẽ kot amnhĩ nhĩpêx anhÿr pymaj kot paj kormã mẽ hwÿr inhmōr kêt nê.

Anhÿr o ijamaxpêr. 24Inhmã ma mẽ awÿr inhmōr nê tanhmã mẽ ate amnhĩ nhĩpêx to hã axte mẽ amã karō kamã ixihÿx prãm kêt. Mẽ akwÿjê rom ra mẽ ate Kris hkôt amnhĩ xunhwÿr tÿx kênã. Tã mẽ ate hkôt amnhĩ nhĩpêx mex o akĩnh nê apaja na inhmã hprãm.

2 1Na pa pre ma mẽ awÿr mō nê mẽmoj tã mẽ amã akir nê nê tanhmã mẽ amã ixkapêr to ka prem inhma nê akaprĩ nê ri apa. Tã inhmã akupÿm mẽ awÿr inhmōr nê axte mẽ amã ixàkjêr prãm kêt jakamã na pa kormã mẽ awÿr inhmōr kêt nê. 2Kot kaj mẽ akĩnh nê apa pa ijaxwÿja ixkĩnh nê ixpa. No kot paj ma mẽ awÿr mō nê mẽmoj tã mẽ amã akir ka mẽ tee ri inhma nê akaprĩ nê. Pa mẽ apumu nê ijaxwÿja ixkaprĩ nê.

3Ja pymaj na pa pre wam ixte mẽ awÿr kagà mēnhhta kamã mẽmoj nê tanhmã mẽ amã ixàkjêr to. Mẽ ate kamã harênh nê mar nê tokyx kormã mẽ awÿr inhmōr xwÿj ri tanhmã mẽ ate amnhĩ tomnuj tota kaga nê tãm amnhĩ nhĩpêx kaxyw. Kêr pa mẽmo arĩgro hã ma mẽ awÿr mōn pōj nê mẽ ate tãm amnhĩ nhĩpêx o apa hã mẽ apumu nê ixkaprĩ hkêt nê ixkĩnh nê. Ka mẽ ajaxwÿja ixpumu nê akĩnh nê. 4Jakamã na pa pre ã mẽ amã kagàta nhĩpêx nê mẽ awÿr mēnh anê. Nê kamã mẽmojta nê tanhmã mẽ amã ixàkjêr to. Na pa pre ixkaprĩ htÿx nê tee ri mẽ akukamã ijamaxpêr o inhmÿr rax pê mẽ amã mẽmojta ã kagà. No ãm mẽ akaprĩ kaxyw na pa pre mẽ amã hipêx kêt nê. ãm mẽ ate kamã harênh nê inhmar nê ajamaxpêr o:

—Hêxta waa nê. Nà Pawre na kãm mẽ pahkĩnh tÿx kumrêx. Hã na pre mẽ pahte tanhmã amnhĩ tomnuj to hã mẽ pajarênh ma nê tee ri mẽ pakukamã hamaxpêr pê kagàja kamã hã mẽ pamã akir nê mẽ pahwÿr

kumě. Nà kām mẽ pahkĩnh tỳx kām na ã mẽ pamã kapěr kām hihtỳx aně.

Anhỳr o ajamaxpěr kaxyw na pa pre hipêx nẽ mẽ awỳr kumě.

Mẽ kot axte amnhĩ tomnuj mã hamaxpěr kêt ã mẽ kām karõ

Rukre 17.3-4; Wam Korīt 5.1-13; Karatas 6.1-2

5-9Nẽ wam kagàta kamã na pa pre mẽ amã mẽ akwỳjê hõ kot nã kaàkre kamã hpijaàm kêeta pa mẽ amã tanhmã hã karõ hto. Ra mẽ ate harěnh mar tã nẽ kām akapěr kêt nẽ. Tã mẽ ate inhmar nẽ nẽ tanhmã kām akapěr to nẽ amnhĩ nẽ hanor kaxyw na pa pre mẽ awỳr kagàja mẽ. Hãmri nẽ ijamaxpěr o:

—Ko. Kojã mẽ ixkapěr mar xà hkõt amnhĩ nẽ hanor japěr. Aně.

Tã ka xep prem kamã harě nẽ ama nẽ tee ri ja hã amnhĩ pumu nẽ akaprĩ nẽ. Nẽ ixpyrà nẽ apijaàm nẽ. Hãmri nẽ ijamaxpěr xà hkõt amnhĩ nẽ hanor kām axihtỳx nẽ. ãm hãmri na ka prem ã hipêx aně. Nhũm xep tee ri ja hã amnhĩ pumu nẽ hkaprĩ nẽ hkaprĩ xàj ri mỳr o pa. Jao ra ã amnhĩ nhĩpêx anhỳrta kaga nẽ akupỳm tãm amnhĩ nhĩpêx. Tã ra ã kot amnhĩ nhĩpêx anhỳr jakamã kwa mẽ tokyx akupỳm amnhĩ wỳr awỳ kêt axte mẽ awỳr mra nẽ mẽ akõt pa. Ra kot amnhĩ tomnujta kaga jakamã kêt ka mẽ axte kām ajamaxpěr kêt nẽ. Akupỳm tãm kām akapěr kêt tokyx akupỳm tãm hamaxpěr nẽ hkĩnh nẽ pa. Kot kaj mẽ tokyx ã hipêx anhỳr kêt nẽ nhũm tee ri amnhĩ kukamã hamaxpěr nẽ hkaprĩ nẽ pa. Ja pymaj kwa mẽ amã hkĩnh ã kãm amnhĩ jarě nẽ akupỳm tãm kãm akapěr pẽ tãm hipêx o ri apa. Kê amnhĩ tã mẽ apumu nẽ akupỳm hkĩnh nẽ tãm hamaxpěr. 10E kêt ka mẽ axte kot tanhmã amnhĩ tomnuj tota mã ajamaxpěr kêt nẽ. Kwarĩ ho kwarĩ. Kot kaj mẽ ã hipêx aně pa ijaxwỳja ma hipêx aně. No pa na pre tanhmã ixtomnuj to hkêt nẽ. ãm Jejus kapěr kwỳm na pre ri ã amnhĩ nhĩpêx aně. Tã ra kot amnhĩ tomnujta kaga jakamã kot paj Jejus nhỹ hã akupỳm tãm hipêx nẽ kot amnhĩ tomnujta o ijamakêtkati tokyx aně nẽ axte kãm ijamaxpěr kêt nẽ. Mẽ apiitã mẽ amex nẽ ri mẽ apa kaxyw. Jakamã kêt ka mẽ ajaxwỳja mẽ amex nẽ apa kaxyw ã amnhĩ nhĩpêx aně nẽ axte kãm ajamaxpěr kêt nẽ. 11Kwa mẽ tokyx ja ho ajamakêtkati. Kê Satanasti tee ri ja hã mẽ apumu nẽ mẽ amã mẽ ate tanhmã amnhĩ tomnuj to hprãm xàj tee ri tanhmã ri mẽ ato ho pa kaprỳ. Kêr pu mẽ Satanasti kot amnhĩ nhĩpêx kêt amnhĩ nhĩpêx o ri papa hkêt nẽ. Ra mẽ pahte Tĩrtũm kapěr kuhpa hã tanhmã kot amnhĩ nhĩpêx to ho pa hã omunh mex kẽnã.

Pawre kot Xitre japěr o pa hã harěnh

12Nẽ na pa pre ja rũm ixkato nẽ ma Tõx wỳr mõ. Ixte mẽ kãm Kris jarěnh o mẽ hkõt ixpa kaxyw ma mẽ hwỳr mõ. Nhũm Pahihti Kris ixkukamã tanhmã mẽ hkrã hto jakamã pa pre mẽ hwỳr pøj nhũm mẽ

piitā kām ixujarēnh mar prām nē. Pa pre mē kām Tirtūm kapēr jarēnh ryy ho mē hkôt ixpa. ¹³Na pa pre Xitre ra mē hwÿr ixkukamā hpôx ā hkamnhix tā nhÿri omunh kêt nē. Hāmri nē ijamaxpēr o:

— Hêxta waa nē. Inhmā Korīt kām Jejus kwÿjê jarēnh mar prām. Na pa tee ri mē hkukamā ijamaxpēr o ixpa. Nom kormā Xitre mē kurūm akupÿn hpôx kêt. Mān kormā Masetōn kamā pa.

Anhÿr o ijamaxpēr hāmri nē mē kām amnhī jarē nē ixkato nē ma Masetōn wÿr krī hkwÿ hkôt hapēr o mō. Tā ra hwÿr ixkato nē omu.

Te mē pahpê mēhkuxwa xà pyrāk ā mē pajarēnh

Epes 5.2; Piripos 4.18

14-16Na Tirtūmja mex o mex. Na hte mē pahto mex rāhā ho pa. Nē mē kot mē panê àmnār xwÿnhjaja nhūm hte tanhmā mē ho pu mē ma paxàmnhix ri mē hkôt mē kām Kris kapēr jarēnh o ri papa. Te mē pahte mē hkuxwa xà ho ri mē hkuxwa ho papa pyrāk. Mē pahte Kris kôt amnhī nhīpêx jakamā Tirtūm mā te mē pahkuxware nē ri mē papa pyrāk. Nē te mē kām Kris jarēnh o ri papa pê te mē hkuxwa xà ho mē hkuxwa ho ri mē hkôt papa pyrāk. Nhūm hte mē hkwÿjaja mē pama nē kām mar prām nē. Nē mē paxujarēnhja haxwÿja te kot mē hkuxwa xà kuxwa mex nhūm htem hpār nē kām ho amnhī kuxwa hprām pyrāk. Jao kām mē pamar prām nē Kris kôt amnhī xunhwÿ. No nhūm mē hkwÿjaja axtem nē mē kēp mē pamar prām nōkati. Mē kumā Tirtūm kapērja te kēp wenēn kuxÿ htÿx nhūm mē kot hpār nē htyk pymaj amÿm kuhê pyrāk. Jao kapēr kaga nē kēp amÿm amnhī xunhwÿ.

Nē na pu htem amnhī krā hkôt mē kām Kris kapēr jarēnh o ri papa hkêt nē. Ām Tirtūm nhÿ hā pix mā tanhmā harēnh to ho papa.

Pawre kot katāt kôt Tirtūm kapēr o mē ahkre hā harēnh

17Na hte mē kot mē kēp Kris nhÿ hā mē ahkre hā amnhī to hêx xwÿnhjaja te Tirtūm kapēr o wēnê pyrāk o mē hkôt pa. Jao kàxpore hprām xāj amnhī krā hkôt tanhmā mē kām harēnh to nhūm htem mē kuma nē hpānhā tanhmā mē kām amnhīrer to. Nom pa na pa hte ā amnhī nhīpêx anhÿr kêt nē. Nē mē urāk nē amnhī krā hkôt Tirtūm kapēr jahkre ho ixpa hkêt nē. Tirtūm kot mē akaxyw ixām jakamā na pa hte ixkatāt kôt Kris nhÿ hā amarī mē amā kapēr jarēnh o ri mē akôt ixpa. No mē urāk nē kàxpore prām xāj mē amā harēnh kêt nē. Tirtūm kot ja hā ixpumunh mex.

3 ¹Mē kēp Kris nhÿ hā mē ahkre hā amnhī to hêx xwÿnhjaja na htem nhÿhÿm nojarêt nē mē kot mar xwÿnhjê mā:

— E kot paj ma nhām krī hō hwÿr mō nē Tirtūm kapēr o mē ahkre. Jakamā kwa mē kaxyw inhmā kagā nhīpêx nē kamā ixte Tirtūm kapēr o mē ajahkre mex xwÿnh ā ijarē nē hā kagā. Hāmri nē inhmā agō pa ma

amnhĩ kôt o mō nē mē kot inhmar mā xw̄ynh̄jê mā kugō kê mē kamā harē nē ijarēnh ma nē kām ixkapēr mar prām nē.

Anh̄yr o na htem amnhĩ to mē hw̄yr o pa. No pa na inhmā ã amnhĩ nhĩpêx anh̄yr prām kêt. Inhmā nhām mē kām amnhĩ to jarkrar prām kêt. Mē ate ja hã ixpumunh mex. Ra mē piitã mē kot ixkatàt kôt ixte Tĩrtũm kapēr jarēnh mex ã ixpumunh mex jakamā mo kaxyw kot pa ri amnhĩ kôt kagà jam̄y nē ho ixpa? Nà kot pa amnhĩ kôt hō ho inhmōr kaxyw hã ixàhw̄yr kêt nē. 2-3Mē kajaja te mē apê inhō kagà pyrāk. Na ka prem ixte mē ajahkre ma nē Jesus kôt amnhĩ xunhw̄yr kurê kumrêx. Hāmri nhũm Tĩrtũm mē amā amnhĩ Karō rē nhũm mē amā agjê ka mē ỹ hã amnhĩ nhĩpêx nyw o amnhĩ nhĩpêx o apa. Hāmri nhũm mē akw̄yjaja amnhĩ jaêr pē mē ate amnhĩ nhĩpêx nyw ã mē apumu nē mē atã xypēn mā ijarēnh o:

—Hêxta waa nē. Pēr ãm hāmri na pre Kris mē hw̄yr Pawre mē. Na pre ma mē hw̄yr mō nē mē kām Tĩrtũm kapēr o mē ahkre nhũm mē kuma nē amnhĩ tomnuj kaga hpa nē hpānhã Tĩrtũm kapēr kôt amnhĩ nhĩpêx nē tām ri amnhĩ nhĩpêx o pa. ãm hāmri na hte Pawre mē ahkre mex o pa. Hêxta waa nē.

Anh̄yr o mē atã ijarēnh jakamā mo kaxyw kot pa kagà hkwȳ jam̄y nē amnhĩ kôt ho ixpa? Nà mē kajaja te mē apê inhō kagà pyrāk.

4Na pa pre Jesus kôt amnhĩ xām nhũm Tĩrtũm ja hã ixpumu nē tanhmã inhmã kapēr o amnhĩrīt to nē inhmã:

—E Pawre. Kêr ka ma mē kām ixkapēr jarēnh o ri mē hkôt apa.

Anh̄yr jakamā na pa hte Tĩrtũm kamnār rom ã amnhĩ nhĩpêx anh̄yr o ri mē hkôt ixpa. 5Nom amnhĩ krã hkôt mē ahkre hkêt nē. Tanhmã kot pa we amnhĩ to nē amnhĩ krã hkôt mē kām kapēr o mē ahkre mex nē? Nà Tĩrtũm pix na hte ja kaxyw tanhmã ixkrã hto pa ô ri mē ahkre ho ri ixpa.

Tĩrtũm kapēr nyw jarēnh

6Nē Tĩrtũm na hte tanhmã ixkrã hto pa Karō nhỹ hã mē piitã mē kām kapēr nyw jarēnh o ri ixpa. Amnepêm Tĩrtũm kot Ijaew mā mēmoj tã karō xw̄ynhta. Mojes kot kapēr tũm jarēnh o pa xw̄ynhta mex tã no nhũm mē tee ri hkôt kām amnhĩ nhĩpêx prām o pa. Nē xatã kamā harē nē omunh tã tee ri kot hkôt kām amnhĩ nhĩpêx prām. Tã mē kot hkôt amnhĩ nhĩpêx kêt m̄yrapê na prem pikaprār pan hapêx. No kêt Tĩrtũm kapēr nywja. Jesus jarēnhja. Na hte Tĩrtũm Karō tanhmã mē pahkrã hto pu mē Jesus kôt amnhĩ nhĩpêx o ri papa. Jao mē pahpê pah̄tĩr tũm nē papa mā xw̄ynh. No na hte nhām mē hkwȳyjaja kām harēnhja mar prām kêt nē amnhĩ jarēnh o:

—Nà kot paj amnhĩ krã hkôt ã amnhĩ nhĩpêx anē nē ã amnhĩ nhĩpêx anē nhũm Tĩrtũm ja hã ixpumu nē ixtĩr tũm nē ixpa mā xw̄ynh ã ijarē.

Anhÿr tâ no âm ã amnhĩ jarênh anhÿr kaprÿ. Tĩrtũm Karõ nhÿ hã mẽ kot amnhĩ to mex o mẽ pa xwÿnh pixjaja koja mẽ htĩr tũm nẽ pa ho pa.

7Nẽ Tĩrtũm kapêr tũmta na pre Mojes mẽ kãm harênh kaxyw nhũm mẽmoj tanhmã amnhĩ nhĩpêx to rax kumrêx. Naja hkrakrak nẽ haxênh nẽ kamã kamàt kô htyk. Hãmri nhũm Tĩrtũm mẽ kot hkôt amnhĩ nhĩpêx kaxyw kên po hã mẽ kãm mẽmoj tâ karõ nhũm Mojes kumÿ nẽ mẽ hwÿr o wrÿ nẽ mẽ kãm kamã harê. Tĩrtũm kot hirã htÿx kamã kãm kapêr nhũm kuri mar o âm jakamã uràk nẽ ÿ hã hkuk nhĩrã htÿx kumrêx nẽ mẽ kãm kapêr jarênh o xa. Jakamã nhũm mẽ tee ri kot hprĩ hã omunh mex kaxyw no âm nom gêk tÿx nẽ. Tã gaa nhũm hkuk kãm hirãja amnhĩm hprĩ nẽ hapêx o mõi. Na pre ã Tĩrtũm Ijaewjê mã kapêr tũm nhõr anẽ. Hãmri nhũm Mojesja ô ri mẽ kãm kamã harê nẽ harênh pa hãmri nẽ mẽ kãm:

—E kêr ka mẽ Tĩrtũm kapêr mar tÿx nẽ hkôt amnhĩ nhĩpêx mex rãhã ho ri apa. Kêr ka mẽ nhÿrmã atyk tâ kê akupÿm mẽ ato mẽ atĩr ka mẽ õ krĩ kamã kuri atĩr tũm nẽ amex nẽ apa ho apa. Anẽ.

Hãmri nhũm mẽ kuma nẽ kãm:

—Tõe. Nà kot paj mẽ hkôt pix mã ri amnhĩ nhĩpêx mex rãhã ho ri ixpa.

Anhÿr ã amnhĩ jarênh tâ no âm hkôt amnhĩ nhĩpêx kêt nẽ nhũm Mojes tee ri mẽ kot amnhĩ nhĩpêx ã mẽ omu nẽ mẽ kãm:

—Nà mẽ ate Tĩrtũm kapêr kôt amnhĩ nhĩpêx kêt jakamã kot kaj mẽ nhÿrmã ty nẽ Tĩrtũm pê awry rax kumrêx nẽ ri apa. Anẽ.

8Tã na hte Tĩrtũm jarãhã axtem tanhmã mẽ pamã kapêr to. Pãnhã kapêr nyw o kapêr nẽ mẽ pamã:

—Kot kaj mẽ Ixkra Jejus kôt amnhĩ xunhwÿ pa hã mẽ apumu nẽ mẽ ato ixkra. Hãmri nhũm Ixkarõ mẽ amã agjê. Anẽ.

Kapêr ja na mex kumrêx o kot kapêr tũm jakrenh. 9Kapêr tũmja mex tâ nhũm htem hkôt amnhĩ nhĩpêx kêt nẽ. Jakamã na htem ty nẽ Tĩrtũm pê awry rax ã ri pa. No kapêr nywja na tũmta rom mex o mex. Na hte Tĩrtũm mẽ pamã kapêr nywja jarênh o:

—Kot paj tanhmã mẽ akrã hto ka mẽ amnhĩ to mex pix o ri apa. Jao ixkôt ri amnhĩ nhĩpêx mex o ri apa. Anẽ.

10Nẽ kapêr tũmja te kot kanê hpôk kryre pyrãk. No kapêr nywja mex o kot tũm jakrenh jakamã te kot mẽmo hpôk rũnh o kanê hpôk kryre jakrenh pyrãk. Jakamã nhũm mẽ kot hirã rax kãm ri mrar gryk ã hpôk grire nhĩrã kamã mrar kêt pyrãk. 11Tĩrtũm kapêr tũm te kot Mojes kuk pyrãk. Na pre kamã hirã rax tâ gaa nẽ amnhĩm hprĩ nẽ kamã hirã hapêx o mõi. Nẽ gaa nẽ hapêx. No kêt Tĩrtũm kapêr nywja te kot Tĩrtũm nhĩrã htÿx rãhã ho rãhãta pyrãk. Koja uràk nẽ aa hapêx kêt kumrêx.

Ijaewjê jarênh*Rômãn 11.7-10*

12Nê Tĩrtũm kapêr nywja mex o mex jakamã na pa hte ixãmnhĩx mẽ kãm harênh o ri ixpa. 13Te ixte Mojes kot amnhĩ nhĩpêx pyræk kêt. Na pre hte Mojes ixkĩnhã àmnhĩx Ijaewjê mã Tĩrtũm kapêr jarênh o ri pa hkêt nê. Mẽ kot hkuk kãm hirãta ra hapêx o mõi ã omunh nhũm hpijaãm pymaj na pre kupêxê puroore ho amnhĩ kuk pro nê ri mẽ hkõt pa. 14Jakamã nhũm prem hprĩ hã hkuk kãm hirã pumunh mex kêt nê. Nê Tĩrtũm kapêr ã kagà htũmja nhũm prem mããnên hprĩ hã mar mex kêt nê. Mẽ hkrã hihtỳx jakamã te mẽ kot amnhĩ jamak pro nê mẽmoj mar mex kêt pyræk jakamã mẽ kot mar tã hprĩ hã mar kêt nê. Nê hkõt ri amnhĩ nhĩpêx mex kêt nê. No mẽ kot Kris kõt amnhĩ xunhwỳr xwỳnhjaja na hte Tĩrtũm amnhĩ tã mẽ omu nê te mẽ nê mẽ hamak hpro xàta rênh par nê rênh pyræk o mẽ hipêx nhũm mẽhprĩ hã kapêr mar tỳx nê.

15Tã na hte Ijaewjaja arĩ jarãhã Mojes kot Tĩrtũm kapêr ã kagà htũm kamã harênh o pa. Nom arĩ mẽ hkrã hihtỳx jakamã te mẽ kot amnhĩ jamak pro nê kamã harênh o pa pyræk o amnhĩ nhĩpêx jakamã kormã hprĩ hã mar kêt nê. 16Tã koja mẽ hkwỳjaja Pahihti Jejus Kris kõt amnhĩ xunhwỳ nhũm amnhĩ tã omu nê te kot mẽ hamak nê hpro xà hpyr nê mẽnh pyræk o mẽ hipêx nhũm mẽhprĩ hã kapêr nyw mar tỳx nê. 17Pahihti mẽ Karõja wa htipxi jakamã na hte mẽ pakamã agjê nê hprĩ hã mẽ pamã kapêr o amnhĩrĩt o pa. 18Ra mẽ pahte Pahihti Kris kõt amnhĩ xunhwỳr jakamã te mẽ pahte mẽ kot amnhĩ jamak pro xwỳnh kot amnhĩ nhĩpêx pyræk kêt. Nhũm Pahihti Karõja tanhmã mẽ panhĩpêx to pu mẽ ra hkõt amnhĩ nhĩpêx mex o mõi. Jakamã na htem mẽ pahte amnhĩ nhĩpêx nyw pumunh kõt Tĩrtũm kot tãm amnhĩ nhĩpêx ã omunh kurê kumrêx. Kormã mẽ pahte hkõt amnhĩ nhĩpêx mex kumrêx kêt tã ra hkõt amnhĩ nhĩpêx mex o mõi. Jao te tãm kot amnhĩ nhĩpêx pyræk o amnhĩ nhĩpêx o mõi.

Jejus kapêr te kêp kanê pyræk ã harênh*Wam Korõt 2.1-5; Sikũn Korõt 1.12; Wam Tesarõn 2.1*

4 1Nê na pre Tĩrtũm ixto mex nê tanhmã kãm ixapênh to hã inhmã karõ. Ixte ma mẽ kãm kapêr jarênh o ri mẽ hkõt ixpa kaxyw. Jakamã na pa hte ixãmnhĩx mẽ hkõt mẽ kãm harênh o ri ixpa. 2Nhũm mẽ hkwỳjaja axtem nê ixêx o ri ixpa hã ijarênh tã ixte ã amnhĩ nhĩpêx anhỳr kêt. Na pa hte amnhĩ tomnuj o ri ixpa hkêt nê. Mẽ hkwỳjaja kot mẽ no kupyw kaxyw mẽ kãm Tĩrtũm kapêr o hêx o pa htã pa na pa hte ã amnhĩ nhĩpêx anhỳr kêt nê. Ixprĩ hã mẽ kãm harênh o ixpaja na inhmã hprãm jakamã na pa hte ixkatãt kõt harênh o ri mẽ hkõt ixpa. Mẽ piitã mẽ kot ixêx kêt kõt ixpumunh mex kaxyw. Tĩrtũm kot ixêx kêt kõt

ixpumunh mex. ³No nhÿrmã mẽ htyk nê ma kuwy hwÿr mẽ pa mã xwÿnh pixjaja na htem hprĩ hã ixkapêr mar mex kêt nê. ⁴⁻⁶Satanasti tãm kêp mẽ hpãm. Kêp mẽ kãm Tirtûm kapêr mar prãm kêt xwÿnh piitã mẽ hpãm. Jakamã na pa hte mẽ kãm tanhmã Jejus jarênh to. Kêp Tirtûm Kra hã harê nê te kot Tirtûm kot amnhĩ nhĩpêx pyrãk ã harênh o ri ixpa. Hãmri nhũm Satanasti tee ri ja hã ixpumu nhũm ja kêp omnuj nê. Jakamã nhũm tanhmã Tirtûm nê mẽ hkrã hto nê te mẽ hamak pro pyrãk o mẽ hipêx. Mẽ kot hprĩ hã Jejus jarênh mar nê hkôt amnhĩ xunhwÿr pymaj nhũm ã nê mẽ hipêx anê. Jejus jarênh te kêp kanê hpøk mex pyrãk jakamã mẽ kot mar kêt xwÿnhjaja te kamàt kô kamã ri mẽ pa pyrãk. No nhũm Satanasti tãm kot nê mẽ no kupyw jakamã nhũm htem ã ri kamàt kô kamã mẽ pa pyrãk o amnhĩ nhĩpêx anê.

Amnepê mã kormã mẽmoj kêt ri nhũm kamàt kô pix. Tã nhũm Tirtûm tanhmã kapêr to nê kapêr o:

—E kê hirã kato. Anê.

Hãmri nhũm ra kapêr xà hkôt hirã kator kurê kumrêx. Tã ja pyrã nê na pa pre kamàt kô kamã ixtÿx ri ixpa pyrãk nhũm Tirtûm te kot inhmã kanê hpøk nhũm hirã pyrãk o inhĩpêx pa mex o mex ã omunh kurê kumrêx. Hãmri nê Jejus Kris kot amnhĩ nhĩpêx ã omu nê te Tirtûm kot amnhĩ nhĩpêx ã omunh pyrãk. Wa kot amnhĩ nhĩpêx te kot axpên pyrãk.

Nê na pa hte pam tanhmã amnhĩ jarênh to ho ri ixpa hkêt nê. ãm Jejus Krisja pix na pa hte harê. Tapxipix na kêp mẽ panhõ Pahihti. Jakamã hkĩnhã te ixpê mẽ amã ixapênh xwÿnh pyrãk o na pa hte mẽ amã kapêr jarênh o ri mẽ akôt ixpa.

Pawre te kêp poti grãre nhĩpêx pyrãk ã harênh

Wam Korîť 2.4-5; Sikûn Korîť 11.23, 12.9

⁷Nê Tirtûm ixrom hihtÿx o hihtÿx. No pa na hkĩnhã ixihtÿx kêt. Te ixpê poti grãre nhĩpêx pyrãk jakamã na pa hte Tirtûm xihhtÿx xwÿnh pix nhÿ hã mẽ kãm kapêr jarênh o ri mẽ hkôt ixpa. Nhũm htem inhma nê ãm hãmri ixte ÿ hã ixkapêr ã ixpumunh kurê kumrêx. No pa ixte amnhĩ krã hkôt ixkapêr ã ijarênh kêt nê.

⁸Na pa hte mẽ hkôt mẽ kãm Jejus jarênh o ri ixpa nhũm mẽ hkwÿja tãhã inhma nê ja hã inhĩpêx kati nê pa amnhĩ xà htÿx kamã ama. Nom nhũm Tirtûm mẽ kutã tanhmã ixkrã hto pa inhmã amnhĩ xã kamã ijamak pywa hkêt nê arĩ mẽ kãm kapêr jarênh o ri mẽ hkôt ixpa. Nê amnhĩ kaxyw Jejus kôt pix mã ijamaxpêr tÿx rãhã pê tee ri amnhĩ kukamã ijamaxpêr o ri ixpa hkêt nê.

⁹Nê mẽ kãm ixkurê xwÿnhjaja ohtô. Na htem xatã Jejus ã tanhmã ixtomnuj to htã pa kormã ixtÿk kêt nê. Na pa hte Tirtûm kamnàr rom arĩ mẽ hkôt ixpa nhũm Tirtûm ixkôt pa ho pa. ¹⁰Na htem Jejus pyrã nê ixpĩr kaxyw tanhmã inhĩpêx to. No ãm ko. Kojã mẽ nhÿrmã ixpĩ rÿ ko.

Ixe amnhī kukamā ixàhpumunh kêt. Kot paj ãm arī ixtīr ri mẽ kãm Jejus jarēnh o ri mẽ hkôt ixpa. Kêr kê mẽ hkwỳjaja ixkapêr ma nê axpên mã tanhmã Jejus jarēnh to nê harēnh o:

— Nà pêr ãm hãmri na pre Jejus akupỹm htīr nê tanhmã hkwỳjê ho mex to. ãm hãmri na hte Pawre ja hã harê. Anê.

11Mê kot Jejus ã ixpīr mã tā pa arī mẽ kãm akupỹm htīr ã harê. Tīrtūm na hte ja kaxyw tanhmã ixkrã hto pa arī mẽ kãm harēnh o ri mẽ hkôt ixpa. 12Na pa pre ra mẽ amã harê ka prem inhma nê Jejus kôt amnhī xunhwỳr kurê kumrêx nê amnhī nhīpêx nyw o amnhī nhīpêx o ri apa. Jakamã ixpyrà nê mẽ apê atīr tūm nê apa mã xwỳnh. Nhūm htem piitã mẽ ate Jejus kôt amnhī xunhwỳr ã mẽ apumu. Tã nhūm mẽ kot Jejus ã ixpīr kaxyw. Nom kwãr mẽ mãmri xpi. Ja inhmã tanhmã kute hkêt. Mẽ kot ixpīr mã tā kot paj arī Jejus kapêr jarēnh o ri ixpa rãhã ty. Ra mẽ kot ixkapêr mar nê Jejus kôt amnhī xunhwỳr xwỳnhjaja mẽ pahpyrà nê kêp htīr tūm nê pa ho pa mã xwỳnh kênã. 13Jakamã kwãr mẽ mãmri xpi. Na pa hte arī amnhī kaxyw Tīrtūm kôt ijamaxpêr mex rãhã nê. Amnepê mã na pre Pahi finat Tawija tanhmã Tīrtūm kapêr jarēnh to nê harēnh o:

ãm hãmri na Tīrtūm kapêrja. Hêx kêt jakamã na pa hte mẽ kãm harēnh rãhã ho ri ixpa. Anê.

Tã pa hte Tawi pyrà nê mẽ piitã mẽ kãm Tīrtūm kapêr jarēnh o ri ixpa. Tīrtūm kot mẽ pamã tanhmã mẽmoj to hêx to hkêt. 14Ra kot amnhī jarēnh xà hkôt akupỹm Pahihti Jejus o htīr jakamã kot puj mẽ nhỹrmã uràk nê ty nhūm akupỹm mẽ pahto mẽ pahṭīr nê ma war amnhī wỳr mẽ pahto api.

15Amnepêm na pa pre ma mẽ awỳr mō nê mẽ akôt mẽ amã Tīrtūm kapêr jarēnh o ri ixpa. Ka prem inhma nê Jejus kôt amnhī xunhwỳ nê ixpyrà nê Tīrtūm mã mex o mex ã harê. Jakamã kwãr mẽ mãmri Jejus ã tanhmã inhīpêx to. Kojã mẽ gaa nê rī mẽ hkwỳjaja mẽ pahpyrà nê Jejus kôt amnhī xunhwỳ nê Tīrtūm mã mex o mex ã harê.

Pawre tee ri amnhī kukamã hamaxpêr kêt ã kot amnhī jarēnh

Rômãn 8.17; Sikūn Korīṭ 1.7; Wam Pêtre 1.3-9, 4.12-16, 5.10

16Jakamã na pa tee ri amnhī kukamã ijamaxpêr o ixkaprī nê ixpa hkêt nê. Mẽ kot Jejus ã tanhmã ixtomnuj to htãã pa hte ixãmnhīx kapêr jarēnh o ri ixpa. Ra ixpigêt nê ixirerek o inhmōr tã inhōpinh xà kaxwỳnh kãm ijamaxpêr o Jejus kôt amnhī nhīpêx mex o mō. 17Mẽ kãm ixkurê xwỳnhjaja na htem Jejus ã inhīpêx kati htã ã inhīpêx anhỹr japjê hkêt nê. Nom kot paj nhỹrmã ty nhūm Jejus akupỹm ixto ixtīr pa Tīrtūm mẽ wa kuri inhmex kumrêx nê ixpa ho ixpa. Mẽ kot ixtomnujja na mẽ ho apkati grêre no kot paj nhỹrmã Tīrtūm mẽ Krata wa kuri inhmex kumrêx nê ixtīr tūm nê ri ixpa ho ixpa. Jao rãhã ho rãhã.

18Jakamã na pa tee ri mẽ kot tanhmã ixtomnuj tota kukamã ijamaxpêr o ri ixpa hkêt nê. Ja koja tokyx hapêx. Na pa hte âm nhỹrmã Tĩrtũm nhõ krĩ kamã inhmex nê ixkĩnh rãhã ri ixpaja pix kukamã ijamaxpêr o ri ixpa.

Mẽ panhĩ nyw jarênh

Piripos 3.21; Sikūn Pêtre 1.13-14

5 1Nê mẽ panhĩja te kot tyrti hô ho ixkre pyrãk. Na htem tyrti hô ho ixkre nhĩpêx nhũm gaa nê hapêx. Tã mẽ panhĩja na hte urãk nê hapêx tokyx anê. Na pu htem ri papa nê gaa nê pawej nê ty. Tã nhũm Tĩrtũm hpãnhã mẽ pahpê hkrajê mã mẽ panhĩ nyw gõ pu mẽ kuri õ krĩ kamã pamex kumrêx nê pahtĩr tũm nê papa ho papa. 2-3Na pu htem jar pahpunuj nê papa. Nê mẽ paxà nhi nê mẽ pahkaprĩ nê. Mẽ panhĩ htũmja te kot mẽ paxê htũm pyrãk jakamã na pu htem ty nê te paxê htũm kwrỹnh nê hpãnhã nyw jagiênh pyrãk o amnhĩ nhĩpêx. Tã na pu htem amnhĩ kukamã panhĩ nywja mã pajamaxpêr o ri papa. Kot pu mẽ kaxkwa kamã pahkarõ pix nê ri papa hkêt nê. Mẽ panhĩ nyw ã kot puj mẽ ri papa ho papa.

4Nê na pu htem jar pahpunuj nê pamex kêt nê ri papa. Nê tokyx mẽ pahtyk nê panhĩ htũm o pajapêx nê hpãnhã panhĩ nyw ã mẽ papa hprãm. Tã koja Jejus tokyx akupỹn wrỹk japêr pu mẽ pahtyk kêt rãhã tokyx panhĩ nywta o panhĩ nyw. Nom koja tokyx akupỹn wrỹk kêt japêr pu mẽ nhỹrmã ty nhũm Tĩrtũm akupỹm mẽ pahto mẽ pahtĩr nê mẽ pamã mẽ panhĩ nyw gõ pu mẽ ho panhĩ nyw. 5-6Na pre ra Tĩrtũm mẽ panhĩ nyw kukamã hamaxpêr nê mẽ pahtã tanhmã amnhĩ jarênh to. Nê mẽ pahwỳr Karõ rê nhũm mẽ pahkarõ mã agjê pu mẽ ja hã amnhĩ pumu nê pahkĩnh nê pajamaxpêr o:

—Nà ra Tĩrtũm kot ixwỳr amnhĩ Karõ mẽnh nhũm ixkarõ mã àr jakamã koja mãänên nhỹrmã inhmã inhĩ nyw gõ. Kormã inhĩ htũm kamã ixpa nê Pahihti Jejus mẽ wa õ krĩ kamã ixpa hkêt tã koja nhỹrmã inhmã inhĩ nywja gõ pa inhĩ nyw o wa kuri ixpa ho ixpa. Nà koja ã inhĩpêx anê.

Anhỹr o pajamaxpêr pê pahkĩnh nê papa.

7Nê mẽ pahte jar pano ho nhỹri Jejus pumunh kêt tã no âm panhõpinh xã kaxwỹnh kãm kãm pajamaxpêr mex nê. 8Jakamã na pu mẽ tee ri amnhĩ kukamã pajamaxpêr o papa hkêt nê. Na pu htem âm tokyx mẽ pahtyk nê ma Pahihti Jejus nhõ krĩ hwỳr paxàpir jamãr o papa. Õ krĩja kêp mẽ papapxà kumrêx jakamã na pu htem ma hwỳr paxàpir pix kukamã pajamaxpêr rãhã nê. 9No âm mẽ pamã ja pix prãm kêt. Na pu htem mãänên pamã Jejus mã hprãm xã hkôt nhỹri tanhmã kãm amnhĩ nhĩpêx to ho ri papa hprãm o papa. Jar mẽ panhĩ htũm rãhã rỳ mũtar kuri õ krĩ mex kãm mẽ panhĩ nyw ã tanhmã kãm amnhĩ nhĩpêx to ho ri papaja na mẽ pamã hprãm.

10Nē na hte Krisja jar mē pahte tanhmā amnhī nhīpêx to hã mē pahpumunh o hkrī. Mē pahte tãm amnhī nhīpêxja nē mē pahte amnhī tomnujja nhūm hte hã mē pahpumunh rãhã ho hkrī. Tã koja nhỹrmã kot mē pahte tanhmã amnhī nhīpêx to hã mē pahpumunh kôt tanhmã mē panhīpêx to. Mē pahte tãm amnhī nhīpêx o ri papa xwỳnhjaja koja ra mē panê htyk kukwak ri mē pahto mex nē. No mē kot amnhī tomnuj o mē pa xwỳnhjaja koja mē homnuj tỳx nē. Jakamã na pa inhmã kãm hprãm xà hkôt pix mã amnhī nhīpêx o ixpa hprãm nē.

Mē pajamexpēr nyw jarēnh

Rômãn 6.4-6; Sikūn Korīt 4.2; Epes 4.22-24; Korosē 3.9-10

11Nē Tirtūm kot hprī hã mē pahpumunh rãhã ho hkrī jakamã inhmã kãm hprãm xà hkôt pix mã amnhī nhīpêx o ri ixpa hprãm. Mãn ka mē ra ja hã ixpumunh mex nē rỳ ko. Mē piitã mē kot hkôt amnhī xunhwỳr prãm xàj na pa hte mē kãm kapēr jarēnh o ri ixpa. 12Nom ixte ja hã amnhī to jarkrar o ri ixpa hkêt. ãm mē ate inhmar nē mē kêp Kris nhỹ hã mē ahkre hã amnhī to hêx xwỳnhjê mã tanhmã ijarēnh to kaxyw na pa ã mē amã amnhī jarēnh anê. Mē kot Tirtūm kapēr jahkre mex kumrêx ã amnhī to jarkrar tã na htem hkôt amnhī nhīpêx kêt nē. Tã mē ate aprī hã ixte Tirtūm kapēr kôt amnhī nhīpêx mex ã ixpumunh nē tanhmã mē kãm ijarēnh to kaxyw na pa ã te ixte amnhī to jarkrar pyrãk o mē amã amnhī jarēnh anê. 13-14Mē kot ixkrã pipãnh ã ijarēnh tã Tirtūm na mē akaxyw ixãm pa hte mē amã kapēr jarēnh o ri mē akôt ixpa. Ixkrã pipãnh kêt. Ixte Tirtūm kãm hprãm xà hkôt tanhmã amnhī nhīpêx to xwỳnh na pa. Tã mēmo kaxyw na pa hte ã kapēr jarēnh rũnh anhỹr o ri mē akôt ixpa? Nà inhmã mē akĩnh kênã. Mē ate Tirtūm kôt tãm amnhī nhīpêx prãm xàj na pa hte ã mē amã kapēr jarēnh anhỹr rãhã nē. Kris na pre tanhmã ixto pa inhmã mē akĩnh nē. Te tãm kãm mē ajapê pyrãk. Na pre Kris amnhī grõnh kôt mē pahpiitã mē nê ty. Tirtūm kot mē pahte amnhī tomnuj mỳrapê tanhmã mē pahto pymaj nhūm mē pahpiitã mē panê ty. Jakamã te mē pahpiitã Jejus kôt mē pahtyk pyrãk o na pu htem amnhī nhīpêx. Jao te mē pahte amnhī nhīpêx tũmja mē pahpê hapêx par pyrãk o pu mē amnhī nhīpêx nyw o amnhī nhīpêx o ri papa. 15Mē pajamexpēr nyw o tãm mē pahte amnhī nhīpêx o papa kaxyw na pre Jejus mē panê ty. Jakamã na pu htem axte amnhī pix kukamã ri pamã mēmoj prãm o ri papa hkêt nē. Na pu htem mããnēn Tirtūm kãm hprãm xà hkôt tanhmã kãm amnhī nhīpêx to ho ri papa. Ja kaxyw na pre Tirtūm akupỹm Kris o htír pu mē kukwak ri pajamexpēr nyw o amnhī nhīpêx o papa. 16Jao mē piitã mē hkrã hkà hã mē omunh xà hkôt pix mã tanhmã mē harēnh to hkêt nē. Mē kot amnhī tomnuj ã mē harēnh rỳ mē kot amnhī to mex ã mē harēnh kêt nē. Amnepê mã na pa pre ã Kris jarēnh anê nē harēnh o:

—Nà Krisja na hte mẽ pahte amnhĩ nhĩpêx kôt amnhĩ nhĩpêx kêt nê. Ām ri kot mẽ pahte amnhĩ nhĩpêx kwỳm ri amnhĩ nhĩpêx jakamã kot amnhĩ tomnuj tỳx xwỳnh na.

Anhỹr ã harênh o ixpa. Tã axte ã harênh anhỹr hkêt nê. Kot amnhĩ tomnuj xwỳnh kêt jakamã na pa hte hpãnhã hkôt pix mã tanhmã kãm amnhĩ nhĩpêx to ho ri ixpa.

Mẽ pahpê Tirtũm kràmnhwỳ há mẽ pajarênh

Rômãn 5.1, 5.10; Epes 6.20; Korosê 1.20

17Nê koja mēhō Kris kôt amnhĩ xãm nhũm kot amnhĩ nhĩpêx tũmja kêp hapêx nhũm hpãnhã kot amnhĩ nhĩpêx nyw pix o amnhĩ nhĩpêx nê hamaxpêr nyw pix o hamaxpêr. 18Tirtũm na hte tanhmã mẽ pahto pu mẽ ã amnhĩ nhĩpêx anhỹr o ri papa. Na pu prem pamã hkurê htã nhũm Kris kukwak ri mẽ pahte hkôt amnhĩ nhĩpêx xwỳnhjê ho hkràmnhwỳ. Hãmri nê tanhmã mẽ pahte amnhĩ nhĩpêx to hã mẽ pamã karō nê mẽ pamã:

—E kêr ka mẽ ma krĩ piitã hkôt ri mẽ kãm ixkapêr jarênh o ri apa kê mẽ ama nê mẽ apyrã nê Kris kôt amnhĩ xunhwỳ. Pa ja hã mẽ omu nê ixte mẽ anhĩpêx pyrã nê mẽ ho ixkràmnhwỳ. Anê.

19Jakamã na pa hte ma mẽ kãm kapêr jarênh o ri mẽ hkôt ixpa nê mẽ kãm:

—E pa mẽ amã mẽmoj mex jarê ka mẽ inhma. Nà na pre Krisja mẽ pahte amnhĩ tomnuj mỳrapê mẽ panê ty. Nê htyk o Tirtũm mã mẽ pahpãnhã amnhĩrer par kumrêx. Jakamã na ra Tirtũmja Kris kukwak ri kãm mẽ pahpiitã mẽ pahto hkràmnhwỳ prãm. Koja kukwak ri mẽ pahte amnhĩ tomnuj piitã ho hamakêtkati nê axte kãm hamaxpêr kêt kumrêx. Kãm mẽ pahto hkràmnhwỳ hprãm jakamã koja ã mẽ panhĩpêx anê. Jakamã e kwa mẽ tokyx Kris kôt amnhĩ xunhwỳ kê Tirtũm kot inhĩpêx pyrã nê mẽ ato hkra nê mẽ ato hkràmnhwỳ.

Anhỹr o mẽ kãm harênh o ri mẽ hkôt ixpa. 20Kris kot mẽ apiitã mẽ awỳr inhmênh jakamã na pa hte y hã mẽ amã kapêr jarênh o ri mẽ akôt ixpa nê mẽ amã:

—E Tirtũm kãm mẽ ajapê jakamã na mẽ awỳr inhmê pa mō. Jakamã kwa mẽ tokyx amnhĩ tomnuj kaga nê hkôt amnhĩ xunhwỳ. Kê amnhĩ tã mẽ apumu nê mẽ ato hkràmnhwỳ. Anê.

21Krisja aa kot tanhmã amnhĩ tomnuj to hkêt kumrêx tã nhũm pre Tirtũmja te mẽ kot amnhĩ tomnuj tỳx kumrêx xwỳnh pyrãk o hipêx. Tã mẽmo kaxyw na pre ã hipêx anê? Nà mẽ panê kênã. Mẽ pahte hkôt amnhĩ xunhwỳr nhũm kot mẽ panhĩpêx o te aa mẽ pahte amnhĩ tomnuj kêt kumrêx xwỳnh pyrãk o mẽ panhĩpêx kaxyw na pre ã mẽ panê Krata nhĩpêx anê.

6 1Tã kot ã Kra nhîpêx anhÿr jakamã kwa mẽ ixkapêr ma nê mar tÿx nê. No mẽ ama nê ãm mar kêt nê. Tirtūm kãm mẽ pajapê htÿx jakamã mẽ pakutã nojarêr rãhã ho pa. Kumã na pa hte ã mẽ amã kapêr jarênh anhÿr o ri mẽ akôt ixpa. 2Amnepê mã na pre Ijaew mã kapêr nê mẽ kãm:

Na ka prem amex kêt nê ri apa nê amnhĩ to ixwÿ pa pre mẽ ama nê mẽmojta pê mẽ apytã nê mẽ ato mex nê. Anê.

Jakamã kwa mẽ inhma. Tirtūm kãm mẽ ate amnhĩ tomnuj pê mẽ apytãr prãm tÿx jakamã kwa mẽ tokyx amnhĩ to awÿ kê ã kêp mẽ apytãr anê.

Mê kot Kris ã tanhmã Pawre nhîpêx to hã mẽ harênh

Sikūn Korīt 4.7, 11.23-33; Korosê 1.10

3-4Nê mẽ kot Tirtūm kapêr mar nê hã ixtomnuj tã pa hte amnhĩ katut kôt mẽ kot tanhmã ixtomnuj toja rê nê ho ijamakêtkati tokyx anê. Nê arĩ mẽ kãm kapêr jarênh rãhã ho ri mẽ hkôt ixpa. Mẽ kot mar nê ãm mar nê hkaga pymaj na pa hte ã amnhĩ nhîpêx anhÿr rãhã nê. Mẽ kot ja hã inhîpêx punuj tã pa arĩ mẽ kãm harênh o ri mẽ hkôt ixpa. 5Mẽ kot Kris ã ixtak nê ijagjênh nê tanhmã ixto kaxyw ixtã htu htã pa hte mẽ kutã amnhĩ to htÿx nê ixkuhê. Na pa pre hte Tirtūm mã mẽ kãm kapêr jarênh rax nê. Jao tōhã inhôt kêt nê inhôtswa ho ri mẽ hkôt ixpa. Nê tōhã inhmã prãm tÿx nê ri ixpa. Tã no ãm arĩ mẽ kãm kapêr jarênh rãhã nê. 6Inhmã tanhmã ixte amnhĩ tomnuj to hprãm kêt. Inhmã Tirtūm kot amnhĩ nhîpêx kôt pix mã amnhĩ nhîpêx prãm. Nê inhmã inhgryk tokyx anhÿr prãm kêt. ãm inhmã mẽ piitã mẽ hkĩnh kãm mẽ ho mex pix prãm. ã na pa hte Tirtūm Karō nhÿ hã amnhĩ nhîpêx anhÿr o ri mẽ hkôt ixpa. Mẽ kot ja hã ixpumunh nê ra Tirtūm kapêr ma nê hkôt amnhĩ xunhwÿr kaxyw. 7Na pa hte ixkatãt kôt mẽ kãm ixkapêr mex pix nê. Tirtūm xihtÿx xwÿnhja nhÿ hã ri mẽ kãm kapêr jarênh jao tãm amnhĩ nhîpêx nê tãm ri ijamaxpêr o ri mẽ hkôt ixpa. Jakamã na htem ja hã ixpumu nê ixte Tirtūm kapêr jarênh ma nê hkôt amnhĩ xunhwÿ. 8Na hte mẽ hkwÿjaja kãm ixkĩnh nê nhũm mẽ hkwÿjaja axtem kãm ixkurê nê. Nê mẽ hkwÿjaja amnhĩm inhmex ã ijarê nhũm mẽ hkwÿjaja axtem axpên mã tanhmã ixto kapêr punuj to. Mẽ kot ixêx nhi hã ijarênh tã pa hte ixkatãt kôt mẽ kãm ixkapêr o ri ixpa. Nom kwãr mẽ mãmri tanhmã ri ixto kapêr to. Ja tanhmã inhmã kute hkêt. 9Na hte mẽ hkwÿjaja ixkamã ôkre kahak nê pika piitã hkôt axpên mã tanhmã ijarênh to ho pa. Mẽ kãm ixpĩr prãm tã no pa arĩ ixtĩr nê ixpa. Mẽ kot Jejus ã ixtomnuj tÿx tã kormã ixpĩr kêt nê pa ri ixtĩr nê ixpa. 10Ixe Kris ã amnhĩ xã htÿx kamã ijamak o ri ixpa htã arĩ ixkĩnh nê ixpa. Nê ixkãxpore hkêt tã nhũm mẽ ohtô nê ixte mẽ kãm Jejus kapêr jarênh kukwak ri mex nê pa. Nê ixkukrêx rax kêt tã nhũm Tirtūm ixto mex nê pa inhmex nê ixpa. Tã kot paj nhÿrmã ô krĩ kamã kuri inhmex kumrêx nê ixtĩr tũm nê ixpa ho ixpa. Jakamã na pa hte arĩ mẽ kãm Jejus kapêr

jarēnh o ri mẽ hkôt ixpa. ¹¹E Korīt kām ixkràmnhwỳjaja. Na pa ixprĩ hã mẽ amã amnhĩ nhĩpêx jarēnh par kumrêx. ¹²Inhmã mẽ akĩnh tỳx tã te mẽ amã ixkĩnh kêt pyràk. ¹³Kwa te mẽ ate ixto mẽ akatut nê akuhê pyràk o inhĩpêx kêt nê. Amnhĩ pyrã nê amã ixkĩnh nê hkêt wehe. Te mẽ apê ixkra pyràk o na pa ã mẽ amã ixkapêr anê.

Te mẽ pahpê Tĩrtúm nhõrkwỳ pyràk ã mẽ pajarēnh

Wam Korīt 10.20-22, 15.33; Epes 5.3-14; Sikūn Ximotre 2.4;

Xiakre 4.4-5; Wam Pêtre 2.11, 4.1-6

¹⁴Nê kêt ka mẽ kot Kris kôt amnhĩ xunhwỳr kêt xwỳnhjê mẽ mẽ mẽmoj tã tanhmã axpên mar to hkêt nê. Rỳ mẽhõ ho amjên rỳ mẽhõ ho aprõ hkêt nê. Ahpỳnhã mẽ pajamxpêr kênã. Tanhmã kot we mẽ hamaxpêr nyw xwỳnhjaja nê mẽ hamaxpêr tùm xwỳnhjaja amnhĩ to nê axpên kôt hamaxpêr nê ri axpên kôt pa? Nà koja mẽ ã amnhĩ nhĩpêx anhỳr kêt nê. Ahpỳnhã mẽ pajamxpêr. Na hte hirã htỳxja kamàt kô mẽ pihkàr kêt nê. ¹⁵Xà na hte Kris mẽ Satanasti wa axpên kôt hamaxpêr? Nà wa kot axpên kôt hamaxpêr kêt. Ahpỳnhã wa hamaxpêr nê ahpỳnhã wa kot amnhĩ nhĩpêx. Nê ahpỳnhã hirã nê ahpỳnhã kamàt kô. Nê mẽ pahpê Kris kwỳjaja nê mẽ kêp hkwỳ hkêt xwỳnhjaja ahpỳnhã mẽ pajamxpêr nê ahpỳnhã mẽ pahte amnhĩ nhĩpêx. ¹⁶Na pu htem Tĩrtúm mã amnhĩ jarēnh xà hã ixkre kamã sãnti xunhwỳr nê amnhĩ to hwỳr pê kãm mex o mex ã harēnh kêt nê. Axtem na sãntija. Mẽ panhõ Tĩrtúmja sãnti rom htĩr tùm rãhã nê pa ho pa xwỳnh. Nê mẽ papajaja te mẽ pahpê Tĩrtúm nhõrkwỳ pyràk. Kapêr ã kagà htùm kot ja jarēnh kot:

Ixkrajaja te kêp inhõrkwỳ nhũm ixpê õ dõn pyràk. Te ixpê inhõrkwỳ kamã ixpa xwỳnh pyràk jakamã kot paj ixkrajê kamã ri ixpa ho ixpa. Ixpê Mẽhpãm na pa. Anê.

¹⁷⁻¹⁸Ã Tĩrtúm xihtỳx xwỳnhja kot amnhĩ jarēnh anhỳr jakamã na hte mẽ kot amnhĩ tomnuj xwỳnhjê nê mẽ pahkurê ho:

Kêr ka mẽ hkôt ri apa hkêt nê. Kwarĩ ho kwarĩ.

Nê mẽ hkôt ri amnhĩ nhĩpêx o apa hkêt nê.

Kot kaj mẽ ixkapêr ma nê ixkôt amnhĩ nhĩpêx hã kot paj amnhĩ wỳr mẽ awỳ nê mẽ ato ixkra.

Nê pa kot paj ixpê Mẽapãm maati. Anê.

7 ¹Tã ã Tĩrtúm kot mẽ pahto hkra nê mẽ pahkôt pa ho pa hã amnhĩ jarēnh kot anhỳr jakamã kwa ixkràmnhwỳjaja. Kêr pu mẽ kapêr ma nê tanhmã amnhĩ tomnuj to hkêt nê. Nê mẽmoj punuj kukamã pajamxpêr kêt nê. Nê ãm kapêr kôt pix mã amnhĩ nhĩpêx mex rãhã nê.

Pawre kot Korīt nhõ xwỳnhjê nhỹ hã hkĩnh ã harēnh

²Nê kwa Kris kôt ixtõ nê ixtõxjaja. Kêr ka mẽ tee ri amnhĩ tã tanhmã inhmã ajamxpêr to hkêt nê. Na pa pre tanhmã mẽ atõ hto hkêt nê. Rỳ

tanhmã mẽ atõ hto ka mẽ ja hã ixpumu nẽ ixkõt tanhmã amnhĩ tomnuj to hkêt nẽ. Rỳ pa pre ixêx rom tanhmã mẽ anokupyr to ho ri ixpa hkêt nẽ. Kwa mẽ amã ixkĩnh nẽ tokyx ixkõt ajamaxpêr kêt wehe. 3Mẽ ate inhmar nẽ amnhĩ tã apijaàm kaxyw na pa ã mẽ amã ixkapêr anhỹr kêt nẽ. Inhmã mẽ akĩnh kênã. Na pa pre inhmã mẽ akĩnh ã amnhĩ jarênh rax nẽ. Inhmã ri mẽ akõt ixpa rãhã ho ixpa hprãm. Rỳ ka mẽ nhỹrmã apiitã apikaprãr par japêr pa inhmã mẽ akõt ixtyk prãm nẽ. 4Na pa hte ra mẽ amã ijamaxpêr pẽ ixkĩnh nẽ ixpa. Nà kot kaj mẽ ixkapêr ma nẽ Jejus kõt amnhĩ nhĩpêx mex nẽ. Tã kêr ka mẽ ã amnhĩ nhĩpêx anhỹr rãhã nẽ. Na pa hte jar ra amnhĩ xà htỳx kamã ijamak o ri ixpa htã no ãm mẽ amã ijamaxpêr nẽ ixkĩnh nẽ.

5Nẽ na pa pre amnẽ Masetõn wỳr kormã Xitre japêr o mõi. Hãmri nẽ Masetõnja wỳr pøj nẽ hapêr pẽ mẽ kãm Jejus kapêr jarênh o ri mẽ hkõt ixpa. Hãmri nhũm mẽ kãm ixkurê xwỳnhjaja Kris ã inhĩpêx punuj nẽ hã inhmã àkjêr pix o pa. Hãmri nẽ ma Masetõn kamã krĩ piitã hkõt ri mẽ kãm ixto kapêr punuj nẽ pa amnhĩ tã mẽ mar o ri mẽ hkõt ixpa. Nẽ mẽ kajaja mẽ ate Kris kaga nẽ nhãm mẽ hamaxpêr kõt amnhĩ nhĩpêx pymaj na pa pre tee ri mẽ akukamã ijamaxpêr o ri mẽ hkõt ixkaprĩ nẽ ixpa. 6Tã Tirtũm kêp mẽ hkaprĩ xwỳnhjê pumunh nẽ akupỹm mẽ ho mẽ hkĩnh xwỳnh jakamã na pre ixkaprĩ hã ixpumu nẽ ixwỳr Xitre mẽ. Pa pre omu nẽ akupỹm ixkĩnh nẽ tãm ijamaxpêr. 7No ãm Xitre pumunh kõt pix mã ixkĩnh kêt. Na pre ixwỳr pøj nẽ tanhmã inhmã mẽ ajarênh to nẽ mẽ ate tanhmã ho mex to hã mẽ ajarẽ. Nẽ mẽ amã ixpumunh prãm tỳx ã mẽ ajarẽ. Nẽ Kris kõt mẽ atõta hpijaàm kêt o pa nhũm ixte kagã kamã hã mẽ amã ixàkjêr nhũm mẽ ate ja hã omunh nẽ ra amnhĩ kamã apijaàm o akaprĩ htỳx ã mẽ ajarẽ. Nhũm Tirtũm kot inhnê mẽ kãm ixkurê xwỳnhjê pumunh mex kaxyw mẽ ate ixto hwỳr ã mẽ ajarẽ. Na pre ã inhmã mẽ ajarênh anẽ pa kuma nẽ mẽ anhỹ hã ixkĩnh tỳx kumrêx.

8-9Nẽ wam ixte mẽ amã kagãta nhĩpêx kêt ri na pa pre tee ri mẽ ate amnhĩ nhĩpêx ã mẽ ajarênh ma nẽ mẽ akaxyw hipêx. Nẽ kamã mẽ ate hpijaàm kêt xwỳnhhta kot tanhmã amnhĩ nhĩpêx to hã omunh nẽ ãm omunh o arĩ hkõt apa hã kagãta kamã mẽ amã akir hãmri nẽ Xitre mã kugõ nhũm kupy nẽ ma mẽ awỳr o mõi. Tã ka xep prem kamã harẽ nẽ ama nẽ amnhĩ kamã apijaàm nẽ. Nẽ akaprĩ nẽ ajamaxpêr o:

—Hêxta waa nẽ. ãm hãmri na Pawre ã mẽ ijarênh anẽ. Na pa mẽ ã amnhĩ nhĩpêx anẽ nẽ amnhĩ tomnuj tỳx nẽ. Anẽ.

Tã nhũm Xitre akupỹn ixwỳr pøj nẽ inhmã mẽ ajarẽ. Pa mẽ ajarênh ma nẽ tee ri ijamaxpêr nẽ ijamaxpêr o:

—Hêxta waa nẽ. Mon pa pre axtem nẽ ã ri mẽ kãm ixàkjêr anẽ? Nà na xep prem kagãta kamã harẽ nẽ kuma nẽ hkaprĩ htỳx nẽ. Anẽ.

Tã ãm hãmri na pa pre ã mẽ akaxyw hipêx nẽ mêmõjta ã mẽ amã ixàkjêr anẽ. Na ka xep prem kamã harẽ nẽ ama nẽ tee ri ajamaxpêr o ra

akaprī nē. Nom Tīrtūm kām hprām xà hkôt na ka prem ja hã amnhī pumu nē ã akaprī anē. Tã xep ra akupým tãm amnhī nhīpêx nē akupým Tīrtūm kôt amnhī nhīpêx mex nē. Jao akupým akīnh nē ri apa. Jakamã ãm hãmri na pa pre mẽ awýr wam kagàta mēnh nē mẽmoj tã ã mẽ amã ixàkjêr anē.

10Koja Tīrtūm krajê hõ tanhmã amnhī tomnuj to. Hãmri nē tee ri ja hã amnhī pumu nē amnhī kamã hpijaàm nē akupým Tīrtūm kôt tãm amnhī nhīpêx. Hãmri nē akupým mex nē tãm hamaxpêr pê hkīnh nē ri pa. Nē axte tee ri amnhī kukamã hamaxpêr hkêt nē. Ja na Tīrtūm kām hprãm. Tã koja mẽ kêp hkra hkêt xwýnhjê pyrã nē tanhmã amnhī tomnuj to nē ra hpijaàm japêr. Nom hkwyjaja kot ja hã omunh pix mýrapê hpijaàm nē arī Tīrtūm kôt amnhī nhīpêx kêt japêr. Hã koja nhýrmã ty nē Tīrtūm kra kot akupým hkôt tãm amnhī nhīpêx xwýnhjê kīnhã Tīrtūm pê awry rax kumrêx nē ri pa.

11Mẽ pahte Tīrtūm kapêr kwým ri tanhmã amnhī nhīpêx to hã tee ri amnhī pumunh nē amnhī kamã hpijaàm nē akupým tãm amnhī nhīpêxja na Tīrtūm kām hprãm. Tã na ka xep ã amnhī nhīpêx anē. Wam ixte mẽ awýr kagà mēnhta na ka xep prem kamã tanhmã ixte nã puro kamã hpijaàm kêt xwýnhta ã mẽ amã ixàkjêr tota kamã akapêr nē ama. Hãmri nē tee ri mẽ ate kormã kot amnhī tomnuj ã kãm axàkjêr kêt ã amnhī kukamã ajamaxpêr nē amnhī kamã apijaàm nē. Nom Tīrtūm kām hprãm xà hkôt. Mẽ ate jam ajamaxpêr pê amnhī kamã apijaàmja na kãm hprãm. Tã ka mẽ hpijaàm xwýnhta kamã agryk nē kãm akapêr o:

—Kwa mẽ pahpê Jejus kwýjaja mẽ pahte ã amnhī nhīpêx anhýr kêt tã ka ã amnhī nhīpêx anē. Nà na ka amnhī tomnuj tỳx kumrêx. Kot kaj ã amnhī nhīpêx anē pa mẽ hã apumu nē gaa nē apyrã nē ã amnhī tomnuj anē. Kwa ja kaga nē axte ã amnhī nhīpêx anhýr kêt nē. Nē akupým Tīrtūm kôt amnhī xãm tỳx nē hkôt amnhī nhīpêx rãhã ho ri apa. Anē.

Hãmri nhũm krī nhõ xwýnhjaja ja hã mẽ ajarēnh ma nē mẽ apê jamnuj ã mẽ apumunh kurê kumrêx. ãm hãmri na ka prem ã kãm akapêr anē.

12Nē ixte mẽ awýr kagà nē mēnhta kamã na pa pre nã puro kamã hpijaàm kêt xwýnhta mã tanhmã ixàkjêr to hkêt nē. Rỳ nã purota mã tanhmã ixàkjêr to hkêt nē. Na pa pre mẽ apê Kris kwýjê hwýr kagà nhīpêx nē kamã tanhmã mẽ amã hpijaàm xwýnhta ã karõ hto. Mẽ ate kamã harēnh hãmri nē inhý hã amnhī nē hanor nhũm Korīt nhõ xwýnh piitã kot ã mẽ ate amnhī nhīpêx anhýr ã mẽ apumunh kaxyw. Nē mẽ ate Tīrtūm nom ã hipêx anhýr jao mẽ amã ixkīnh pê ixkapêr kôt ã hipêx anhýr ã amnhī pumunh kaxyw.

13Tã nhũm Xitre ixwýr pøj nē tanhmã inhmã mẽ ajarēnh to. Na xep pre mẽ awýr nojarêr nē tee ri amnhī kukamã hamaxpêr. Mẽ ate kagàta kamã harēnh nē ijarēnh mar nē kamã agryk pymaj tee ri amnhī kukamã

hamaxpēr. Tã ma mẽ awÿr mōn pōj nē mã amã kugō. Ka xep prem kamã harē nē ama nē hkôt amnhĩ nhĩpêx kurê kumrêx nhũm mẽ ate amnhĩ nhĩpêx ã mẽ apumu nē hkĩnh nē. Hãmri nē tãm hamaxpēr. Tã ra akupÿn ixwÿr mō nē inhmã mẽ ajarē pa mẽ ajarēnh ma nē ijaxwÿja ixkĩnh nē. 14Na pre kormã mẽ awÿr nojarê pa kãm tanhmã mẽ amex ã mẽ ajarēnh to. Tã nhũm xep ma mẽ awÿr mōn pōj nē mẽ apumu nē hamaxpēr o:

—Nà pēr ãm hãmri na pre Pawre inhmã mẽ mex ã harē. Mẽ mex kênã. Anē.

15Tã nhũm pre mẽ arũm kato nē ra man akupÿn ixwÿr mōn pōj nē inhmã mẽ ajarēnh o:

—Na pa pre ma mẽ hwÿr mō nē mẽ kãm ixkapēr o ri mẽ hkôt ixpa nhũm mẽ ixkapēr ma nē ixkôt amnhĩ nhĩpêx kurê kumrêx nē ixto mex nē. Kormã ixte mẽ hwÿr inhmōr kêt tã mẽ harēnh ma nē inhmã mẽ hkĩnh nē. Tã pa ma mẽ hwÿr mō nhũm mẽ ixto mex rax nē pa ra inhmã mẽ hkĩnh tÿx kumrêx. Anē.

16Ã inhmã mẽ ajarēnh anē pa mẽ ajarēnh ma nē ixkĩnh tÿx nē. ãm hãmri na ka htem mẽmoj tã amnhĩ jarēnh xà hkôt tanhmã amnhĩ nhĩpêx to ho apa.

Mẽ kot Kris kôt mẽ hkwÿjê pê õxÿ hkêt ã mẽ kãm karō

Atre 11.27-30; Rõmãn 15.25-27; Wam Korīt 16.1-4

8 1E Kris kôt ixkwÿjaja. Kot paj hpãnhã mẽ amã jar Masetōn kamã tanhmã Jesus kwÿjaja kot amnhĩ nhĩpêx to hã mẽ harē ka mẽ harēnh ma. Na hte Tĩrtũm mẽ kutã nojarê nhũm mẽ mex nē pa. 2Mẽ hkwÿjaja kot Kris ã mẽ hipêx kati nhũm mẽ kot amnhĩ xà htÿx kãm hamak o pa htã hkĩnh nē hamakêtkati nē ri pa. Nē mẽ hkàxpore hkryre htã ho õxÿ hkêt nē pa. Na htem àmnhĩx ri mẽ kêp amrakati xwÿnhjê mã hkwÿ nhõr o pa.

3-4Tã na prem Jerujarē kamã Kris kôt mẽ pahkwÿjê jarēnh ma. Mẽ kêp amrakati hã mẽ harēnh ma nē kãm mẽ hkaprĩ nē. Nē mẽ kãm mẽ hwÿr mẽmoj rēnh nē mẽ ho ajuta hprãm nē. No ãm pa ixte mẽ kãm hã karō xà hkôt kêt. Mẽ tãmjaja mẽ hamaxpēr xà hkôt na prem ã hamaxpēr anē nē mẽ kaxyw kàxpore ho pikuprõnh rax nē. Hãmri nē inhmã kugō nē inhmã:

—Kwa na pa prem Jerujarē kamã Kris kôt mẽ pahkwÿjê jarēnh ma nē mẽ inhmã mẽ hkaprĩ nē mẽ kãm mẽ ixkàxpore hkwÿ ho akuprō. Jakamã e amÿ nē ma mẽ hwÿr o mō nē mẽ kãm agō kê mẽ tokyx ho amnhĩm awjaprō nē kuku. Anē.

5Pa mẽ kuma nē ixtÿx ho ãm kàxpore grire hã hkamnhĩx nē ijamaxpēr o:

—Kwa mo mẽ hikàxpore rax koja mẽ ri ho akuprō nē mẽ kãm kugō? ãm mẽ hikàxpore hkryre kênã.

Anhÿr o ijamaxpēr tā no nhūm mẽ kaxyw ho rax nē ho akuprō. Mẽ hikàxpore hkryre htā mẽ kām òr rax nē. Hāmri nē inhmā amnhĩ jarēnh o:

— Na pa mẽ ra Pahihti Jejus Kris mã amnhĩ gō. Mẽ ixte tanhmã kām amnhĩ nhĩpêx to ho ri ixpa kaxyw. Jakamã e tanhmã mẽ inhmã mẽmoj tā karō hto. Kot pa mẽ ama nē akapēr kôt amnhĩ nhĩpêx. Ja na pa mẽ inhmā hprām nhūm Tirtūm haxwÿja kām ja prām. Anē.

6Na pa pre ã mẽ kot amnhĩ nhĩpêx anhÿr ã mẽ omu nē mẽ apê Korīt nhō xwÿnhjê mã ijamaxpēr kurê kumrêx. Hāmri nē Xitre mã mẽ ajarê. Na pre mẽ awÿr mō nē mẽ amã Jerujarê nhō xwÿnhjê jarê. Mẽ ate mẽ kām kàxpore hkwÿ ho apikuprōnh kaxyw. Tã pa pre jam ijamaxpēr nē ra akupÿm mẽ awÿr mẽnh mã nē kām:

— Kwa ma akupÿm Korīt wÿr mō nē mẽ kām anē kê mẽ ra kot amnhĩ jarēnh xà hkôt Jerujarê nhō xwÿnhjê kaxyw kàxpore hkwÿ ho akuprō nē tokyx mẽ hwÿr kumê. Ra mẽ kām Kris kôt mẽ hkwÿjê hkĩnh ã amnhĩ jarēnh kēnã. E kwa tokyj. Anē.

7Na ka htem amnhĩ to mex o ri apa. Nē amnhĩ kaxyw Kris hkôt ajamaxpēr tÿx nē. Nē ma mẽ kām Tirtūm kapēr jarēnh mex o ri mẽ hkôt apa. Nē mẽ ajamaxpēr mex nē. Nē mẽ piitã mẽ ho mex o ri apa. Nē mẽ amã ixkĩnh o ri apa. Jakamã kwa kêr ka mẽ axàmnhix mẽ kēp amrakati xwÿnhjê mã mẽ akàxpore hkwÿ nhōr o apa. Jao mẽ amã Tirtūm kĩnh tÿx ã amnhĩ to amnhĩrīt. 8Ixe ã mẽ amã ja hã karō anhÿr tã hã mẽ atã ixihitÿx kêt nē. ãm mẽ kamã axukapri hkôt mẽ ate mẽ kām axàmnhōr o apa kaxyw na pa ã mẽ amã ixkapēr anē. Masetōn kamã mẽ pahkwÿjaja kot amnhĩ nhĩpêxta pyrã nē. 9Ra mẽ ate Jejus Kris kām mẽ pajapê hã kot tanhmã amnhĩ nhĩpêx to hã mar mex. Amnepēm na pre kaxkwa kamã mex kumrêx nē ri pa ho pa nhūm mẽmoj piitã kēp ò htã nhūm rer pa nē mẽ pahwÿr wrÿ nē mẽ pakamã kēp amrakati nē ri pa. Hikàxpore hkêt nē ri pa. Tã mẽmo kaxyw na pre ã mẽmoj mex piitã rer par nē mẽ pahwÿr wrÿk anē? ãm kot mẽ pahto mex pix kaxyw. Kot mẽ pahto mex nhūm mẽ pahte kukwak ri mẽ paxàmnhix ri mẽ pajamakêtkati nē mẽ papa kaxyw na pre ã amnhĩ nhĩpêx anē. Mẽ pahte nhÿrmã urāk nē kaxkwa kamã pamex kumrêx nē ri papa ho papa kaxyw.

10E kwa kêr ka mẽ tokyx kàxpore hkwÿ ho apikuprōnh pa nē Jerujarê nhō xwÿnhjê hwÿr amē. Mẽ akumrêxjaja na ka prem ham amgrã hapêxta kamã ra mẽ kaxyw ho apikuprōnhja krax. Mẽ amã mẽ ho mex prām xàj ham ho hkrax tã no ãm kormã hatur xàm mẽnh nē mẽ hwÿr mẽnh kêt nē. 11Kwa mẽ tokyx ja ho ajapêx nà. Na ka prem ate ho anhÿr krax ã akĩnh pê kàxpore hkwÿ ho apikuprōnh o apa. Tã kêr ka mẽ arĩ akĩnh rãhã ho apikuprōnh par jatur xàm amē. No mẽ ri atÿx tanhmã ajamaxpēr to hkêt nē. Rÿ mẽ ajamaxpēr o:

—Nà kormã. Kot paj nhÿrmã ixkàxpore rax nê rĩ kormã mẽ hwÿr hkwy mẽ.

Anhÿr o mẽ ri ajamaxpêr hkêr nê. Mẽ ate tanhmã akàxpore hkre kamã kute hã omunh xà hkôt mẽ kãm hkwy pix gô. ¹²Kêr ka mẽ axàmnhix akĩnh kãm mẽ kãm ho akuprô. Ate amnhĩ kàxpore pumunh xà hkôt. Ka mẽ akàxpore rax nê mẽ kãm ho rax nê agô. Rÿ mẽ akàxpore grire nê mẽ kãm ho grire nê agô. Ja na kêt mex. ¹³No mẽ ate mẽ kãm ôr par nhũm mẽ arom mẽ hikàxpore rax nê ri paja mex kêt. ¹⁴Nom ra mẽ akàxpore rũnh jakamã kwa mẽ amnhĩ kutã mẽ kãm hkwy ho hkryre nê ho akuprô kê mẽ apyrã nê hikàxpore nê ri pa. Kêr ka mẽ nhÿrmã tanhmã amnhĩ to nê axà nê nhũm akàxpore apê hapêx nhũm mẽ ajarênh ma nê amnhĩ kuxwar mẽ ato ajuta nê mẽ amã hkwy ho akuprô nê mẽ awÿr kumê. Ka mẽ akàxpore ho axpên pyrã nê ri apa. ¹⁵Amnepêm Tĩrtũm kot kaxkwa rũm Ijaewjê hwÿr mẽô rênh nhũm mẽ kot apkati mẽ amnhĩm hkawrà nê ho apkur o pata ã na pre Tĩrtũm kapêr ã kaga htũmja ã mẽ harênh anê nê mẽ harênh kot:

Na pre mẽ hkra xohtô xwÿnhjaja mẽ apkur xà hkawrà rũnh nê.

Nê gôj kãm unhwÿ nê kuku nê piitã ho ôhy htu. Nhũm mẽ hkra grêre xwÿnhjaja haxwÿja hkwy kawrà no ãm ho hkryre nê hkawrà. Nê gôj kãm unhwÿ nê kuku nê haxwÿja ho ôhy htu hpa. Na pre htem apkati mẽ ã amnhĩ nhĩpêx anhÿr o pa. Anê.

Ja pyrã nê kêr ka mẽ akàxpore ho axpên pyrãk o ri ho apa.

Xitre mẽ hkràmnhwÿjê jarênh

¹⁶Nê Xitre na pre ixpyrà nê kãm mẽ ato ajuta hprãm nê. Na pre inhmã mẽ atã amnhĩ jarê pa pre kuma nhũm ja inhmã mex nê pa ixkĩnh nê. Nê ijamaxpêr o:

—Nà ãm hãmri na Tĩrtũm tanhmã Xitre hkrã hto nhũm ã hamaxpêr mex anê. Anê.

¹⁷Tã pa ma akupÿm mẽ awÿr môr ã hkukja nhũm inhma nê hkĩnh nê mẽ awÿr nojarêr kurê kumrêx. Nom kormã ixte kãm mẽ ajarênh kêt ri nhũm tãm amnhĩ kukamã hamaxpêr nê mẽ awÿr hkrã. ¹⁸Tã na ra nojarêr kaxyw. Kot paj ma hkôt Kris kôt mẽ pahtôjê hõ mẽ kê ma hkôt mô. Kôt ixte mênh xwÿnhhta na hte mẽ kãm Tĩrtũm kapêr jarênh mex nê nhũm htem amnhĩm mex ã harê. ¹⁹Na pre jar Jesus kwÿjaja kot ma ixkôt Jerujarê hwÿr kàxpore hkwy ho môr kaxyw nhũm prem amnhĩm mẽ kurê. Tã koja Xitre mẽ wa mẽ awÿr môn pôj ka mẽ kãm kàxporeta gô nhũm man akupÿn o mô pa wa rĩ kormã ma Jerujarê hwÿr mẽ kãm o mô. Mẽ kot hamÿnh nê mẽ pamã mẽ hkĩnh ã kot amnhĩ tã mẽ pahpumunh kaxyw. Nê Tĩrtũm mã mex o mex ã harênh kaxyw. ²⁰⁻²¹Nom kàxpore rax nhũm ixte mẽ hwÿr o inhmôr nhũm mẽ kot hã

ixkamnhīx pymaj kot paj ma amnhī kôt Kris kôt mē pahtōta o mō. Ixte Xitre hkôt mē awÿr mēnh xwÿnhhta pa ma amnhī kôt o mō. Nom ixàhkīnh o ixpare hã. Tirtūm kot ja kôt ixpumunh mex tã kot paj ma amnhī kôt o mō.

22Nē ot pa ma Xitreta wa hkôt axte mē awÿr ja mē. Kêr kê mē axkrunēpxi nē ma ixkukamã mē awÿr mō. Ixte wa hkôt mēnh xwÿnhhta ixte kot amnhī nhīpêx ã omunh mex. Na hte kãm mē piitã mē ho ajuta ho pa hprãm nē. Tã mē ajarēnh ma nē inhmã mē ajarēnh o:

— Nã koja mē Jerujarē nhō xwÿnhjê mã kàxpore nhōr rax nē kãm ga. Mē kot amnhī to mex kēnã. Anē.

Jakamã ra mē awÿr hkrã. Tã koja ma Xitre wa hkôt mō nē mē ato ajuta ka mē tokyx kàxpore ho apikuprōnh pa.

23Nē koja mēhō tanhmã Xitre hã mē akukjêr to ka mē kēp ixkràmnhwÿ mex ã harē. Nē kot inhīhkô hã mē ho ajuta mex o pa hã harē. Na pre ra jar Kris kwÿjaja mē akaxyw kuta nē ma mē awÿr kumē. Jakamã koja ma mē awÿr mō nhūm Kris kôt mē pahtōjê hō wa pijakrutja wa ma hkôt mō. Na hte wa haxwÿja Kris kôt amnhī nhīpêx mex o pa. 24Koja mē awÿr pōj ka mē omu nē mē ho mex nē. Nē mē amã mē hkīnh nē. Kê krī piitã hkôt Kris kôt mē pahkwÿjê piitã mē hã mē ajarēnh ma nē axpēn mã mē amex ã mē ajarē. Nē mē ajarēnh o:

— Pēr ãm hãmri na pre Pawreja mē pamã Korīt kãm mē pahkwÿjê jarē. Na xep pre Xitre mē hkwyta ma mē hwÿr mō nhūm mē ho mex rax nē. Ra Pawre kot mē pamã mē harēnh xà hkôt. Anē.

Mē kot kàxpore ho pikuprōnh ã mē harēnh

9 1-2Kwa ixkràmnhwÿjaja. Kot paj Jerujarē nhō xwÿnhjê kaxyw mē atã ixihtÿx kêt nē. Ra mē amã mē ho ajuta hprãm jakamã na pa pre Masetōn kamã Kris kôt mē pahkwÿjê mã mē ajarēnh o:

— Pika pê Gres kamã Kris kôt mē pahkwÿjaja na prem ham amgrã hapêxta kamã Jerujarē kamã mē pahkwÿjê jarēnh ma nē kãm mē ho ajuta hprãm. Anē.

Hãmri nhūm mē ajarēnh ma nē mē apyrã nē kãm tanhmã mē ho ajuta hto hprãm. 3-4Tã ot pa mē awÿr Xitre mē hōta wa mē ho ixpimràatã wa mē kumē. Mē kot kàxpore hã mē akukjêr kaxyw. Kêr pa mytwrÿ hō hã ma Masetōn nhō xwÿnh kwÿjê mē mē awÿr mō nē ra ixte mē kãm kàxpore hkwy ho mē apikuprōnh ã mē ajarēnh kôt mē ate ho apikuprōnh rax ã mē apumu nē ixkīnh nē. Nom kot pa mō nē tee ri hapêr nē te ixte Masetōn nhō xwÿnhjê mã mē ato ixêx pyrã nē ixpijaàm nē. Ka mē ajaxwÿja amnhī kamã apijaàm nē. 5ã mē pahte amnhī nhīpêx anhÿr pymaj na pa ã mē amã kagàja nhīpêx nē Xitre mã òr nē ma amnhī kukamã mē awÿr mēnh anē. Nē hkôt wa mōr mã xwÿnhhta mē ho ixpimràatã amnhī kukamã wa mē kumē. Tã kê mē awÿr pōj nē mē amã

kagàja gō ka mē kamā harē nē ama nē tokyx kàxpore ho apikuprōnh jatur xàm amē. Kêr pa mē hapu hã mē awÿr mō ka mē ra mē ixkutêp ho apikuprōnh pa nē mē kãm agō nē ajamakêtkati nē apa. No pa ixte mē amã mē ate ho apikuprōnh kaxyw mē atã ixihtÿx kêt. 6Na htem piitã ã hamaxpêr anhÿr o pa nē hamaxpêr o:

— Kot ka apur rax nē kamā anhō rax nē. Nom kot ka apur grire nē kamā anhō grire.

Anhÿr o hamaxpêr jakamã kêr ka mē apiitã ajamakêtkati nē Jerujarē nhō xwÿnhjê mã kàxpore nhōr mex nē. Kêr ka mē ho apikuprōnh pa nhūm rax nē. Te mēhō ihpur rax nē kamã õ raxta pyræk. Kê Tirtūm ã mē ate amnhĩ nhĩpêx anhÿr ã mē apumu nē nhÿrmã mē ato mex nē. 7Nom kêr ka mē anhōxÿ kamã mē kãm õr kêt nē. Mē pahte pahkĩnh kãm panhōxÿ hkêt kãm mē kêp amrakati xwÿnhjê mã mēmoj nhōr o papaja na Tirtūm kãm hprãm. 8-9Koja mē hã mē apumu hãmri nē amnhĩm mē amex ã mē ajarēnh rãhã ho pa. Mē kãm Tirtūm kĩnh xwÿnhjaja na htem àmnhĩx ri mē kêp amrakati xwÿnhjê mã mēmoj nhōr o pa. Te Tirtūm kot amnhĩ nhĩpêx pyræk. Na hte àmnhĩx ri mē pamã mēmoj nhōr o pa. Mē pahwÿr na rē nhūm wrÿ. Nhūm mē pamã mē paxàpkur xà nhōr o pa. Nē tanhmã mē pahto pu mē paxà hkêt nē pajamakêtkati nē paxàpênh o papa. Nē pamex nē ri papa. Panhō rũnh nē ri papa. Jakamã kwa pu mē uræk nē paxàmnhĩx ri mē kêp amrakati xwÿnhjê mã mēmoj nhōr o papa.

10E pa ixprĩ hã mē amã ja jarē ka mē inhma. Nà na hte ã Tirtūm mē pamã mē paxàpkur xà nhōr o pa anē. Kot kaj apur kãm ahkre nhūm tanhmã amã mēmo hyta nhĩpêx to nhūm amã hapôx mex nē amã õ rũnh nē ka anhō rax nē. Nē hkwȳ ho axàpkur o apa nē axte hkwȳ hkre. Tã kêr ka mē ã Tirtūm kot mē ato mex anhÿr ã amnhĩ pumu hãmri nē uræk nē axàmnhĩx ri mē kêp amrakati xwÿnhjê mã axàmnhōr pē mē ho mex o ri apa. Nhūm Tirtūm mē hã mē apumu nē mē amã mēmoj nhōr rãhã nē. Ka mē amnhĩ pyrã nē mē kêp amrakati xwÿnhjê mã hkwȳ nhōr o apa. 11Koja Tirtūm mē ato mex rax nē ka mē anhō mēmoj rax nē. Ja o amnhĩ xwar mē kêp amrakati xwÿnhjê kaxyw kàxpore hkwȳ jaxwÿ. Kêr pa mē amã hkwȳ jamÿ nē ma Tirtūm kôt mē pahkwÿjê mã o mō nē mē kãm kugō kê mē omu nē hkĩnh nē. Nē mē atã Tirtūm mã mex o mex ã harē. 12Hãmri nē mē akukwak ri mex nē ri pa. Nē axpên mã Tirtūm mex



Sikūn Korīt 9.7

o mex ã harẽnh o ri pa. 13Koja mẽ amnhĩ tã mẽ apumu nẽ hkĩnh nẽ. Hãmri nẽ Tĩrtũm mã amnhĩ tã tanhmã mẽ ajarẽnh to nẽ kãm:

—Pa Tĩrtũm. Nã ãm hãmri na pre Korĩt kãm akõt mẽ ixkwỳjaja amnhĩ jarẽ. Na htem akõt pix mã amnhĩ nhĩpêx mex o ri pa. Jao mẽ ixpê õxỳ hkêt nẽ mẽ inhmã kàxpore hkwy nhõr rax nẽ. Àmnhĩx ri hamakêtkati nẽ mẽ inhmã hkwy nhõr rax nẽ. No ãm mẽ papxipix na htem ã mẽ inhĩpêx anhỹr kêt nẽ. Na htem mẽ kêp amrakati xwỳnh piitã ã mẽ hipêx anhỹr o pa. ãm hãmri na ka pre tanhmã mẽ hkrã hto nhũm mẽ anhỹ hã ã amnhĩ nhĩpêx anhỹr o pa. Amex o amex Tĩrtũm. Anẽ.

14Hãmri nẽ mẽ ato hwỳr o:

—Pa Tĩrtũm. ãm hãmri na hte Korĩt nhõ xwỳnhjaja amnhĩ pyrã nẽ mẽmoj to mẽ ixkutã nojarêt o pa. Jakamã aa mẽ ixte amnhĩ tã mẽ inhno ho mẽ omunh kêt tã mẽ inhmã mẽ hkĩnh nẽ. Kwa kêr ka mẽ ixtã mẽmoj to mẽ kutã anojarêt rãhã ho apa Tĩrtũm.

Anhỹr o mẽ ato kuwỳ. 15Tĩrtũmja mex o mex. Nom na hte mẽ pahto mex pê mẽ pamã kàxpore nhõr kêt nẽ. Kra Jejusja na pre mẽ pamã kugõ. Kãm mẽ pajapê ho mẽ pahwỳr kumẽ nhũm mẽ pahwỳr wrỳ nẽ mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Ja na mex o kot mẽ pamã kàxpore nhõr jakrenh. Mẽhõ koja uràk nẽ ã mẽ panê htyk anẽ? Nã amrakati ho amrakati. ãm Jejus pix na pre ã amnhĩ nhĩpêx anẽ.

Pawre kêp Tĩrtũm Karõ nhỹ hã kapêr xwỳnh ã harẽnh

Epes 6.10-20; Wam Tesarõn 5.8

10 1E Kris kõt ixkwỳjaja. Nã ixpê Pawre kot paj mẽ akwỳ kot tanhmã ixto kapêr to xwỳnhjê mã amnhĩ jarẽ ka mẽ apiitã inhma. Nã na hte Kris mẽ pakamã gryk tokyx anhỹr kêt nẽ. Na hte mẽ pahto mex japjê nẽ. Tã inhmã uràk nẽ ã mẽ anhĩpêx anhỹr prãm nẽ. No na hte mẽ akwỳjaja axpẽn mã tanhmã ixto kapêr punuj to nẽ ri axpẽn mã:

—Pawre na hte nhỹri krĩ kamã pa nẽ mẽ pamã kagã nhĩpêx nẽ mẽ pahwỳr kurẽ nẽ kamã mẽmoj tã mẽ pamã kapêr kãm hihtỳx nẽ hã mẽ pamã akir. Tã amnẽ mẽ pahwỳr mõ hãmri nẽ te kãm mẽ pahpyma pyrãk o mẽ pamã kapêr o pa.

Anhỹr o ijarẽ. 2Nom inhmã mẽ awỳr inhmõr nẽ mẽmoj tã mẽ amã ixàkjêr prãm kêt tã kot paj nhỹrmã mẽ awỳr mõ ka mẽ tanhmã amnhĩ tomnuj to ho apa japêr. Pa ja hã mẽ apumu nẽ hã mẽ amã akir kãm ga. 3Na pa htem jar pika ja kamã Tĩrtũm kwỳ hkêt xwỳnhjê kaêx ã ri ixpa nom mẽ uràk nẽ amnhĩ krã hkõt tanhmã amnhĩ nhĩpêx to ho ixpa hkêt nẽ. Nẽ mẽ uràk nẽ amnhĩ krã hkõt tanhmã ijamaxpêr to ho ixpa hkêt nẽ. Na pa htem Tĩrtũm Karõ nhỹ hã àhpumunh xà ho amnhĩ nhĩpêx o ri ixpa. 4Nẽ Tĩrtũm xàhpumunh tỳx xà ho mẽ kãm kapêr jarẽnh o ri ixpa.

Mē kot mar nē hkôt amnhī nhīpêx kaxyw. Nē àhpumunh tỳx o na pa htem mē kot Tirtūm kôt amnhī xunhwỳr pymaj mē kêp àmnàr xwỳnhjaja tanhmã mē nē mē ho. ⁵Na htem htỳx ri tanhmã Tirtūm nē hkwyjê mã kapêr to ho pa. Amnhī kaxyw hkôt mē hamaxpêr kêt kaxyw tanhmã nē mē kãm kapêr to. Na pa htem ja hã mē omu nē Tirtūm xàhpumunh tỳx xà ho tanhmã mē kãm ixkapêr to nhūm mē tee ri inhma nē axte mē kêp àmnàr kêt nē. Pa mē kãm Tirtūm kapêr jarê nhūm mē ohtô nē kuma nē Kris kôt amnhī xunhwỳ nē hkôt amnhī nhīpêx o pa. ⁶Tã mē kajaja kot kaj mē Tirtūm kôt amnhī nhīpêx mex tã mē atô ra kapêr nhīrôp xa nē tanhmã amnhī tomnuj to. Pa ja hã apumu rỳ hã ajarênh ma nē hã amã akir. ⁷Mē ate Tirtūm kot mē awỳr inhmênh kêt ã axpên mã ijarênh tã kot kaj mē atô ãm hãmri apê Kris kwỳ hã amnhī pumu nē ra mãânên pa ixpê hkwy hã ixpumunh kurê kumrêx. Mē apyrà nē ixpê hkwy kênã. ⁸Na pa pre ma mē awỳr mō nē tanhmã mē amã amnhī jarênh to nē mē amã:

—Tirtūm na pre mē awỳr inhmê pa mō. Ixte ÿ hã mē amã kapêr jarênh o ri mē akôt ixpa kaxyw. Anê.

Tã pa hte arī ã amnhī jarênh anhỳr o ri ixpa. ãm hãmri na pre Tirtūm mē awỳr inhmê pa hte ãm hãmri mē amã kapêr jarênh o ri mē akôt ixpa. Na pa hte Tirtūm nhỹ hã mē amã ixkapêr nē kapêr o ixêx o amnhī to jarkrar kêt nē. Ixte tanhmã mē atomnuj to ho ri ixpa kaxyw na pre Tirtūm mē awỳr inhmênh kêt. Mē amã ixkapêr mex nhūm mē ate inhmar nē Kris kapêr kôt amnhī nhīpêx mex o apa kaxyw na pre mē awỳr inhmê. ⁹E kwa Kris kôt ixkwỳjaja. Na pa hte mē amã ixpuma kaxyw mē awỳr kagà rênh kêt nē. Mē ate kamã harênh nē tee ri amnhī kukamã ajamaxpêr o amnhī kamã amã ma kaxyw kêt. ¹⁰Mê akamã mē kãm ixkĩnh kêt xwỳnhjaja na htem ijarênh o:

—Pawre na hte awry hã pa nē mē pahwỳr kagà rênh nē kamã te kêp pahi ho amnhī nhīpêx pyrà nē mēmoj tã mē pamã kapêr kãm hihtỳx nē. Tã mē pahwỳr pôj hãmri nē kapêr kaxyw nom kapêr kãm hihtỳx o kapêr kêt nē. Jakamã mo kaxyw kot puj mē hwỳr mra nē kapêr ma?

Anhỳr o ijarê. ¹¹Nom ã ixte anhỳr kêt. Kwa mē inhma. Kot paj nhỹrmã ma mē awỳr mō hãmri nē te kagà ja kamã mē amã ixkapêr pyrak o mē amã ixkapêr nē ixkapêr xihtỳx o mē amã ixkapêr kãm ga.

¹²Na hte mē akwỳjaja kot amnhī to mex o mē ajakrenh ã amnhī to jarkrar o ri pa. No ãm amnhī krã hkôt pix mã na htem ã ri amnhī jarênh anê. Na hte Tirtūm ã mē harênh anhỳr kêt nē. ¹³Tã inhma mē urak nē ã amnhī jarênh anhỳr prãm kêt. ãm ixte Tirtūm kot tanhmã inhma karô hto xà hkôt amnhī nhīpêx o ixpaja na inhma hprãm. Tã mē kajaja mē awỳr na pre inhmê. ¹⁴Ra kot mē awỳr inhmênh jakamã ixkumrêx na pa pre mē awỳr mō nē mē akôt ri mē amã tanhmã Kris jarênh to ho ri ixpa. Tirtūm kãm nhỹhỹm ixpa hprãm xà pix wỳr na inhma ixpa hprãm.

15No kêt mẽ kot amnhĩ krã hkôt htỳx ri Tĩrtũm kapẽr jahkre o mẽ pa xwỳnhjaja na htem nhỹri krĩ kamã mẽ kot Kris kôt amnhĩ xunhwỳr ã mẽ harẽnh ma nẽ mẽ hã amnhĩ to jarkrar o ri pa. Te tãm kot mẽ hwỳr mõi nẽ mẽ kãm ujarẽnh nhũm mẽ kot mẽ mar xà hkôt Kris kôt amnhĩ xunhwỳr pyrãk. Nẽ mẽ hã amnhĩ to jarkrar o:

—E na pa pre ma mẽ hwỳr mõi nẽ mẽ kãm Tĩrtũm kapẽr jarẽ nhũm mẽ inhma nẽ hkôt amnhĩ xunhwỳr kurẽ kumrẽx. Ixkukwak ri na prem ã amnhĩ nhĩpêx anẽ. Anẽ.

Nom ã amnhĩ nhĩpêx anhỹrja ã amnhĩ to hêx. No pa na pa hte ho mẽ urãk kêt nẽ. Koja Tĩrtũm ma nhỹri krĩ hwỳr ixkwỳjê hõ mẽ nhũm ma hwỳr mõi nẽ mẽ kãm Kris kapẽr jarẽ. Hãmri nhũm mẽ kuma nẽ Kris kôt amnhĩ xunhwỳ. Pa mẽ harẽnh ma nẽ mẽ ỹ hã ixkĩnh nẽ nom pa ixkukwak ri mẽ kot hkôt amnhĩ xunhwỳr ã amnhĩ to jarkrar kêt nẽ. Ixte mẽ hwỳr ixpa nẽ mẽ kãm ixujarẽnhre hã kot pa hkêt mẽ hã amnhĩ to jarkrar. ãm Tĩrtũm kãm nhỹhỹm ixpa hprãm xà pix wỳr na pa hte ixpa nẽ mẽ kãm kapẽr jarẽ. Jakamã kot kaj mẽ nhỹrmã Kris kôt amnhĩ nhĩpêx mex o ri apa pa ja hã mẽ apumu nẽ mẽ are nẽ hpãnhã ma krĩ hõ hwỳr Kris kot mẽ hwỳr inhmẽnh xà hõ hwỳr mõi. Ka mẽ ja hã ixto Tĩrtũm wỳr o apa. 16Kot paj mẽ anhõ krĩ kamã mẽ piitã mẽ kãm Jejus kapẽr jarẽnh pa hãmri nẽ hpãnhã ma krĩ hkwyỳ hkôt ijapõx o ri ixpa nẽ kamã mẽ kãm harẽnh o ri mẽ hkôt ixpa. Kormã aa mẽ kot mar kêt kumrẽx xwỳnhjê mã harẽnh o ri mẽ hkôt ixpa. Na pa hte ã mẽ hwỳr ixpa nẽ mẽ kãm ixujarẽnh anẽ. Jakamã nhũm mẽ ja hã ixpumu nẽ mẽ kot Tĩrtũm kapẽr mar xwỳnhjê pix wỳr ixpa hã ijarẽnh kêt nẽ.

17Nẽ Tĩrtũm kapẽr ã kagà htũm kot mẽmoj tã mẽ kot amnhĩ to jarkrar ã harẽnh kot:

Kêr ka mẽ kamjaja amnhĩ mex ã amnhĩ to jarkrar kêt nẽ. ãm Tĩrtũm pix mã mãn mex o mex ã harẽnh o ri ho jarkrar o ri apa. Anẽ.

18Kot pu mẽ Tĩrtũm noo mã amnhĩ to mex ã amnhĩ to jarkrar nẽ ãm amnhĩ to jarkrar kaprỳ. Nom koja Tĩrtũm tãm ja hã mẽ pahto jarkrar nẽ ãm hãmri mẽ pahte amnhĩ to mex xwỳnh ã pahto jarkrar.

Jejus kot mẽ hwỳr mẽ rẽnh ã amnhĩ to hêx xwỳnhjê jarẽnh

Matêwre 7.15; Rõmãn 16.17; Karatas 1.6-9; Korosẽ 2.8; Sikũn Pêtre 2.1

11 1E kot paj te mẽ hkrã pipãnh xwỳnh kot htỳx ri amnhĩ jarẽnh pyrãk o tanhmã mẽ amã amnhĩ to jarkrar to. Kwa mẽ inhma nẽ ixkamã agryk kêt nẽ. No mẽ ixkapẽr kumrẽx mãn ma. 2Inhmã mẽ akĩnh. Te ho Mẽpahpãm Tĩrtũm kãm mẽ akĩnh ta pyrãk. Te mẽ apê mẽhõ kukrit kãm my hkĩnh nẽ kot ho mjên prãm xwỳnh ta pyrãk. Kãm mẽmyjê piitã mẽ hkĩnh kêt ãm kãm pix kĩnh. Ja pyrã nẽ kêr ka mẽ amã Kris kĩnh o nhãm amã mẽ hkĩnh xwỳnhjê jakre. Te ho mẽhõ ni kot kãm myta pix

kĩnh nẽ kãm ho mjên prãm xwỳnhhta pyræk. Ja na pa inhmã hprãm. ³Ra mẽ amã Kris kĩnh tỳx o apa nẽ hkõt amnhĩ nhĩpêx mex o ri apa htã nhũm mẽ kot amnhĩ krã hkõt htỳx ri Tĩrtũm kapêr jahkre ho mẽ pa xwỳnhjaja tee ri ja hã mẽ ajarênh ma nẽ axpên mã mẽ ajarênh o:

—Kwa nà ja mex kêt. Koja mẽ Pawre kapêr ma nẽ ãm kuma nhũm ja mex nẽ. No mẽ pahkõt mẽ kot amnhĩ nhĩpêxja na mẽ pamã mex. Ja na kêt mẽ pamã mex o mex. Anẽ.

Hãmri nẽ ra kot Kris nẽ tanhmã mẽ amã hêx to kaxyw. Te amnepê mã kagã kot mẽ panã kot wa pê Ewa mã hêx nhũm kot mar nẽ hkõt amnhĩ nhĩpêxta pyræk. ⁴Na pa pre ra mẽ awỳr mỗ nẽ mẽ amã tanhmã Jejus jarênh to. Nẽ tanhmã mẽ amã Tĩrtũm Karõ jarênh to. Nẽ tanhmã wa kot mẽ pahto hkra hto hã mẽ amã wa harẽ ka prem inhma nẽ mar tỳx nẽ. Tã nhũm ra mẽ kot htỳx ri Tĩrtũm kapêr jahkre xwỳnhjaja ixpãnhã mẽ awỳr mỗ nẽ Jejus kapêr kwỳm ri tanhmã mẽ amã ujarênh to nẽ mẽ amã harênh o hêx rãhã ho pa. Nẽ Tĩrtũm Karõja nhũm mẽ amã tanhmã ho hêx to. Nẽ ixte mẽ amã Tĩrtũm kapêr jarênh kwỳm ri ixpãnhã tanhmã mẽ amã harênh to ho pa. Na ka prem mẽ ama nẽ ãm hãmri harênh ã hkamnhĩx. Kwa kêr ka mẽ ri mẽ ujarênh piitã mar nẽ hkõt amnhĩ nhĩpêx kêt nẽ. Mẽ kot Jejus jarênh tã no ãm katat kõt harênh kêt nẽ. ãm ri ho hêx o pa. Ka htem ama nẽ ãm hãmri harênh ã hkamnhĩx nẽ mẽ amã mẽ mar prãm nẽ. Mẽ kot mẽ amã harênh o hêx o pa htã ka mẽ ama nẽ ra mẽ hkõt amnhĩ nhĩpêx kaxyw. Kwa mẽ ri ã amnhĩ nhĩpêx anhỳr hkêt nẽ. ⁵Kris kot mẽ awỳr mẽ rênh ã mẽ kot amnhĩ jarênh tã amnhĩ to hêx. Ka prem ama nẽ ãm hãmri mẽ kot mẽ amã harênh ã mẽ hkamnhĩx. Nom na pre Krisja mẽ awỳr mẽ rênh kêt nẽ. Kêt pa na pre mẽ awỳr inhmẽ. ⁶Mẽ hkĩnhã ixkapêr krór pyræk tã no ãm ixte Tĩrtũm kapêr mar tỳx. Nẽ kot amnhĩ nhĩpêxja na ixte omunh par. Ra mẽ ate ja hã ixpumunh mex.

⁷Na pa pre mẽ akõt ri mẽ amã Jejus jarênh o ri ixpa no ãm hpãnhã mẽmoj tã mẽ awỳr o ri ixpa hkêt nẽ. Xà amarĩ ixte mẽ amã harênh nẽ hpãnhã mẽmoj tã mẽ awỳr kêtja mẽ apê omnuj? ⁸⁻⁹Kormã ixte mẽ amã Tĩrtũm kapêr jarênh o ri ixpata ã na pa pre hte tõhã kàxpore ho presija no ãm aa hã mẽ awỳr kêt nẽ. Jar Masetõn kamã Kris kõt mẽ pahkwỳjaja na prem ixwỳr hkwy rênh o pa pa ho ixàpkur xà japrõr o ri mẽ akõt ixpa. Mẽ kumã ixte Tĩrtũm kapêr jarênh o ri ixpa hkêt tã pa hte mẽ kukwak ri mẽ akõt ho ixàpkur o ri ixpa. Tã kot paj arĩ ã mẽ akõt ixpa nẽ ã amnhĩ nhĩpêx anẽ nẽ mẽmoj tã mẽ awỳr o ri ixpa hkêt nẽ. ¹⁰Ja inhmã mex. Jakamã kot paj amarĩ mẽ anhõ pika pê Gres kãm ã mẽ amã Tĩrtũm kapêr jarênh o ixpa anẽ nẽ mẽmoj tã mẽ awỳr kêt nẽ. ãm hãmri na pa ã mẽ amã amnhĩ jarênh anẽ. Kris pyrã nẽ ixêx kêt kênã. ¹¹Xà we inhmã mẽ akĩnh kêt kõt na pa hte ã mẽ amã Tĩrtũm kapêr jarênh pãnhã mẽ awỳr kêt anẽ? Nà inhmã mẽ akĩnh jakamã na pa hte kapêr jarênh pãnhã mẽ

awÿr o ri ixpa hkêt nê. Inhmã mẽ akĩnh tÿx kênã. Tĩrtũm kot ja hã ixpumunh mex. **12**No mẽ kot amnhĩ krã hkôt htÿx ri Tĩrtũm kapêr jahkre xwÿnhjaja na htem mẽ ajahkre hpãnhã kàxpore hã mẽ awÿr pix o pa. Nê mẽ amã tanhmã amnhĩ to hêx to nê mẽ amã:

— Nã mẽ ixte Pawre kot amnhĩ nhĩpêx pyrãk. Mẽ ixte amnhĩ nhĩpêxa kot axpên pyrãk.

Anhÿr o mẽ amã amnhĩ to hêx. Nom ixte ho mẽ urãk kêt kumrêx. Mẽ ixte amnhĩ nhĩpêx kot axpên pyrãk ronhÿx pa mẽ urãk nê kàxpore hã mẽ awÿr o ri ixpa. Nom ixte ã amnhĩ nhĩpêx anhÿr kêt. Kot paj aa ã amnhĩ nhĩpêx anhÿr o ixpa hkêt nê. **13**Ã mẽ kot amnhĩ nhĩpêx anhÿr xwÿnhjaja na pre Tĩrtũm mẽ awÿr mẽ rênh kêt nê. Mẽ kot Kris nhÿ hã mẽ ahkre xwÿnh ã amnhĩ jarênh tã ãm amnhĩ to hêx. **14**Mẽ õ pahi Satanastija te mẽmoj mex jarênh pyrãk tã no ãm na hte mẽ pano kupyw pê mẽ pamã tanhmã hêx to ho mẽ pahkôt pa. Te kot mẽmoj mex ã ãm hãmri kot harênh pyrãk tã no ãm ho hêx. **15**Tã hkôt mẽ kot amnhĩ nhĩpêx xwÿnhjaja na htem urãk nê te tãm mẽ kot amnhĩ nhĩpêx xwÿnhjê pyrã nê mẽ pahwÿr mra nê tanhmã mẽ pamã hêx to. Satanasti pyrã nê mẽ pano kupyw kaxyw tanhmã mẽ pamã hêx to. Nom koja Tĩrtũm nhÿrmã mẽ pahã mẽ homnuj tÿx kumrêx nhũm mẽ rĩ amnhĩ pumu.

Tanhmã mẽ kot Kris ã Pawre nhĩpêx to ã mẽ harênh

Atre 9.23-25

16E kot paj axte te ixtÿx ri amnhĩ to jarkrar pyrãk o mẽ amã tanhmã amnhĩ jarênh to ka mẽ inhma nê ixkamã agryk kêt nê. **17**Pahilhti Kris nhÿ hã kot paj mẽ amã amnhĩ jarênh kêt ãm amnhĩ krã hkôt kot paj mẽ amã amnhĩ jarê. **18**Na htem ohtô nê mẽ ate mẽ hã apijaãm kaxyw tanhmã mẽ amã amnhĩ to jarkrar to ho pa. Tã kot paj mẽ urãk nê amnhĩ krã hkôt mẽ amã amnhĩ to jarkrar ka mẽ inhma. **19**Mẽ ate amnhĩ xàhpumunh tÿx ã amnhĩ jarênh tã ka htem htÿx ri mẽ kot amnhĩ to jarkrar o ri mẽ pa xwÿnhjê kapêr ma nê mẽ hkôt ajamaxpêr nê mẽ hkôt amnhĩ nhĩpêx kurê kumrêx. **20**Mẽ kot Kris nhÿ hã mẽ ahkre hã amnhĩ to hêx xwÿnhjaja mẽ pakurom mẽ kot amnhĩ to rax xwÿnh ã amnhĩ jarênh jakamã na htem mẽmoj tã mẽ amã karõ ho pa.

Nê mẽ kãm hprãm xà hkôt nhÿhÿm mẽ arê nê nhÿhÿm mẽ arê.

Nê mẽ apa pix kukwak ri apkur o pa.

Nê mẽmoj tã mẽ ajakwap mẽ atak o pa.


Ã mẽ kot mẽ anhĩpêx anhÿr tã ka te mẽ ate atũm kêt pyrã nê atÿx ri mẽ kapêr ma nê mẽ hkôt amnhĩ nhĩpêx o ri apa. **21**Tã ixte mẽ urãk nê ã mẽ anhĩpêx anhÿr kêt tã kot paj mẽ urãk nê mẽ amã tanhmã amnhĩ to jarkrar to ka mẽ inhmar japêr. Te ixtÿx ri amnhĩ jarênh pyrãk o kot paj mẽ amã amnhĩ jarê nom ãm hãmri mẽ amã amnhĩ jarê. **22**Mẽ kot Jejus

nhỹ hã mẽ ahkre hã amnhĩ to mẽ hêx xwỳnhjaja na htem mẽ amã tanhmã amnhĩ to jarkrar to nê mẽ amã:

—E mẽ inhma. Mẽ ixpê Ijaew na pa mẽ. Mẽ arom mẽ ixpê finat Apraãw kanrêhã htãmnhwỳ jakamã kwa mẽ ixkapêr ma nê mẽ ixkôt amnhĩ nhĩpêx. Anê.

Nom ijaxwỳja ixpê Ijaew tã pa hte mẽ uràk nê ja hã amnhĩ to jarkrar hkêt nê. 23Nê mẽ kot Kris kapêr jarênh mex o pa hã amnhĩ jarênh tã pa na pa hte harênh mex o mẽ hakre. Te ixkrã pipãnh pyràk o ã mẽ amã amnhĩ jarênh anhỹr tãã.

E pa mẽ amã tanhmã amnhĩ jarênh to ka mẽ inhma. Nà na pre Kris ã mẽ kãm ixkurê xwỳnhjaja mẽ kot amnhĩ to jarkrar xwỳnhjê hkĩnhã Kris ã ixpynênh nê ijagjênh xohtô nê. Nê mẽ hkĩnhã tôhã ixtak rũnh kumrêx. Pa mẽ hkĩnhã xatã mẽ kot tanhmã ixto hã kritpêm ronhỹx pa pre ty. 24Na pre Ijaew krãhtũmjaja Kris ã ixkatut kãm ixtak rũnh nê. Nê ixtak xàja pĩ hã mry kà janhôr o ixtak. Nê ixtak kaxyw nê ixtak xà jatur xà kamã kàx xwa gixre janhô nê ho ixtak rũnh o ixkatut kà rê. Ixtak o 39 hãmri nê rĩ kormã mẽ kot ixpĩr pymaj inhmã ure. Na pre htem nhỹri ixpynê nê ã inhĩpêx anê. Na prem ã inhĩpêx anhỹr o 5 wês.



Sikũn Korĩt 11.23-25

25Nê na prem ra mẽ kot ixpĩr kaxyw nê kên rũnh kwỳ jamỳ nê ho ixtak o kuhê. Nê Rõm nhõ xwỳnhjaja haxwỳja pĩ ho ixtak rax kumrêx. ã inhĩpêx anhỹr o axkrunêpxi.

Nê na pa pre hte gô xujanãr kãm nhỹhỹm Jejus jarênh o ri ixpa kaxyw pàr kãm mẽ hwỳr ixpa nhũm pàrja tanhmã amnhĩ to nê agjê. Kritpêm nhỹx pre hte gôja ixpĩ. Pa pre ã amnhĩ nhĩpêx anhỹr o axkrut. Tã arĩgro hõ hã kê axte pàr õ mã axà nê ma axte krĩ hõ hwỳr mõ. Nhũm kê pàrta axte mẽ ixpê axà nhũm gôja nhỹx kê axte ixpĩ. Pa pàr jakà hã kumỳ nê hã ijêt o amỹkry. Nê ho apkati. Tã nhũm nhỹhỹnh pàr ôja mõ nhũm kamã mẽ mõi xwỳnhjaja ixpumu nê ixwỳr pàr o mõi nê amnhĩ wỳr ixto api nê ma amnhĩ kôt ixto mõi.

26Na pa pre amnhĩ xà htỳx kamã ijamak o ri ã mẽ kãm Kris kapêr jarênh o ri ixpa anê. Kironhỹx pre gô tàmja ixpĩ. Nhũm mẽ àhkĩnh nhi xwỳnhjaja kironhỹx prem mãänên ixpĩ. Nê Ijaew nê Ijaew kêt xwỳnhjaja tôhã tanhmã ixtomnuj to ho pa. Pa pre krĩ hkwy hwỳr ixpa rỳ kapôt ã ixpa nhũm mẽ ixtã amỹnê. Pa pre gô xujanãr kãm pàr kãm ri ixpa nê

nhÿx kamā ty. Nhūm mẽ kêp Kris kwÿ hā amnhĩ to hêx xwÿnhjaja haxwÿja tanhmā ixtomnuj to pa mẽ ŷ hā amnhĩ xà htÿx kamā ijamak o ri ixpa. Ā na prem Kris ā inhĩpêx anhÿr o pa.

27Nê na pa Jejus kapêr jarênh o ri ixpa kurê ixkêngrà nê ri ixpa. Nê tōhā inhôt kêt ā ixtā apkati. Nê tōhā inhmā prām nê inhmā kôr nê ri ixpa. Nê tōhā ixê mex kêt nê inhmā kry nê ri ixpa. 28Na pa hte Kris kapêr jarênh o ri ixpa pê ā amnhĩ nhĩpêx anê. Nom ja pix kêt. Na pa hte krĩ piitā hkôt Kris kwÿjê hkukamā tee ri ijamaxpêr nê ijamaxpêr o:

—Hêxta waa nê. Mãn mẽ arĩ Kris kôt amnhĩ nhĩpêx mex japêr rÿ ko. Mãn mẽ ra kapêr kwÿm ri tanhmā amnhĩ tomnuj to rÿ ra hkaga.

Anhÿr o ijamaxpêr o ixpa.

29Nê na hte mêhō Tirtūm kapêr nhĩrôp xa nê tanhmā amnhĩ tomnuj to pa tee ri omu nê ixkaprĩ htÿx kumrêx. Koja mêhō tanhmā Tirtūm nê mêhō mã kapêr to nhūm kuma nê Tirtūm kôt amnhĩ nhĩpêx kêt pa tee ri ja hā omu nê nê kêp àmnàr xwÿnhhta kamā inhgryk tÿx kumrêx.

30E Kris kôt ixkwÿjaja. Na pa ā mẽ amā amnhĩ jarênh anê. Te ixte amnhĩ to ijarkrar pyrāk no ãm mẽ ate ixirerek xwÿnh ā ixpumunh pix kaxyw. 31Ām hāmri na pa ā mẽ amā amnhĩ jarênh anê. Ixêx kêt. Pahihti Jejus nhĩpêxà Tirtūm kot ja hā ixpumunh mex. Tirtūmja mex o mex. Koja mex o mex tūm nê pa rāhā ho pa. Tām kot ixirerek ā ixpumunh mex. 32Kormā krĩ pê Tamas kām ixpare ri na pre mẽ õ pahi Arêtja mẽ kām ixtā amÿnê nhūm pōristijaja krĩ hpu hā kahê xà nhō hakwakre piitā kām hipôk pa nê ixkām hamak o kuhê. Pa tee inhmā nhÿhÿnh ixkator nê ma mẽ umaj ixprôt nê ixtêm prām nê ixirerek xwÿnh ā amnhĩ pumunh kurê kumrêx. 33Tā nhūm Kris kôt mẽ pahkwÿjaja hamaxpêr nê kawà rax mÿ nê o tē nê inhmā ãm pa hwÿr axà nê kamā nhÿ. Hāmri nhūm mẽ pàr nhôr o kahê nhĩrô pê ixto wrÿ pa ixkato nê mẽ kêp amūxu nê amnhĩm ixprĩ nê ma tē nê mẽ kêp akunok. Ā na pre Tirtūm ixirerek xwÿnh ā inhmā ixto amnhĩrīt anê.

Tirtūm kot Pawre mã mẽmoj to amnhĩrīt ā harênh

12 1E Kris kôt ixkwÿjaja. Nà inhmā amnhĩ to jarkrar hprām kêt tã kot paj tanhmā mẽ amā amnhĩ jarênh to ka mẽ inhma nê hā ixtā apijaam japêr. Na hte Tirtūm tōhā inhôt kām ixkarō mã tanhmā kapêr to. 2-3Amnepê mã amgrà hō hā na pre tanhmā ixkrā hto nê õ krĩ hwÿr amnhĩ wÿr ixto api. Na pre ra hā amgrà pê 14 ãn. Apu inhĩ rāhā ixto api rÿ apu ãm ixkarō pix o api rÿ ko. Ixte ja hā amnhĩ pumunh mex kêt. Tirtūm pix kot ja hā ixpumunh. 4Na pre ixto api pa pôj nê õ krĩ kamā axtem tanhmā mẽ kapêr to hā mẽ kuma. Na prem mẽmoj mex kumrêx jarê pa kuma nê ixkĩnh nê. Nê inhmā mar prām nê. Hāmri nê ijamaxpêr o:

—Hêxta waa nê. Mẽmoj jarênhja mex kumrêx. Nà kot paj akupÿm wrÿ nê ixkwÿjê mã harê kê mẽ ixpyrà nê kuma. Nà kot paj anê.

Anhỹr tã nhũm Tĩrtũm Karõ ja nẽ ixkurẽ nẽ inhmã:

— Nã kër ka mẽ kãm ja jarẽnh kêt nẽ. ãm kapxipix kot kaj ama nẽ ri hã apa.

5Anhỹr jakamã pa pre paxipix mẽ arom mẽmojja pumu nẽ kuma nom kot paj ri hã amnhĩ to jarkrar kêt nẽ. Kot paj ãm Jejus pix tanhmã harẽnh to ho ri ixpa. Jao ixrom mex o mex ã harẽ. Nẽ ixrom hihtỹx o hihtỹx nẽ àhpumunh o àhpumunh ã harẽnh o ri ixpa.

6Nẽ ixte Tĩrtũm nhõ krĩ hwỳr ixàpirja ãm hãmri ixte hã amnhĩ jarẽnh tã kot paj ja hã amnhĩ to jarkrar o ri ixpa hkêt nẽ. Mẽ ate ja hã inhmar kõt inhmex ã ijarẽnhja na inhmã hprãm kêt. Nom kot ka mẽ ixte tãm amnhĩ nhĩpêx ã ixpumu nẽ tãm ixkapêr ã inhma hãmri nẽ rĩ kormã inhmã inhmex ã ijarẽ. ã mẽ ate amnhĩ nhĩpêx anhỹrja na inhmã hprãm. 7Na pre Tĩrtũm inhõt kãm inhmã mẽmoj mex kwỳ jarẽnh rax nẽ. Hãmri nẽ hpãnhã inhmã:

— E na ka akwỳjê rom inhõ krĩ hwỳr api nẽ mẽ kurom mẽmoj mex pumunh rax nẽ. Tã ate ja hã amnhĩ pumunh nẽ ma mẽ kãm hã amnhĩ to jarkrar o ri apa pymaj kot paj Satanasti mã anẽ nhũm inhma nẽ tanhmã atomnuj to ho pa. Nom ijamaxpêr xà hkõt koja ã anhĩpêx anẽ.

Anhỹr jakamã nhũm tanhmã inhĩpêx to pa inhmex kêt nẽ ixpa. Te mrõnhĩ rax nhỹhỹnh kot ixkamnhwỳr nhũm inhmã tee ri hkaxàr prãm kaprỳ nẽ ỹ hã ho inhgiêx rãhã nẽ ixpaja pyræk. 8Tã pa tee ri ja hã amnhĩ pumu nẽ amnhĩ to Jejus wỳ nẽ kãm:

— Kwa Pahшти. Na pa ra mẽmojta nhỹ hã ixpunuj nẽ ixirerek nẽ ixpa. Kwa inhnẽ ata pa akupỹm ixihỹx nẽ ijamakêtkati nẽ ri ixpa nã?

Anhỹr o amnhĩ to hwỳr o axkrunêpxi. 9Hãmri nhũm inhmã:

— Nã kot paj anẽ hyr kêt nẽ. Kot paj ãm akutã inhnojarêt rãhã ho ri akõt ixpa. Ka axirerek nẽ apa htã ixihỹx xwỳnh ã ixpumunh kõt ixkamnàr rom tanhmã inhỹ hã amnhĩ nhĩpêx to ho ri apa. Anẽ.

ã inhmã kapêr anhỹr jakamã na pa ixpunuj nẽ ri inhĩrot nẽ ixpa htã ixrom hihtỹx xwỳnhhta nhỹ hã ixkĩnh nẽ ixpa. Nẽ kurom ixirerek xwỳnh pix ã amnhĩ to jarkrar o ri ixpa. 10Jakamã kot paj Kris ã ixpunuj nẽ ri ixpa htã ixkĩnh nẽ ijamakêtkati nẽ ri ixpa. Kwãr mẽ mãmrĩ hã tanhmã ixto kapêr to nẽ tanhmã hã inhĩpêx to pa amnhĩ xà htỹx kamã ijamak o ri ixpa. Nẽ ixpê amrakati nẽ inhĩrot nẽ ri ixpa htã Kris nhỹ hã tanhmã kãm amnhĩ nhĩpêx mex to rãhã ho ri ixpa.

Pawre kot tee ri mẽ hkukamã hamaxpêr ã harẽnh

11Tã mẽmo kaxyw na pa ã mẽ amã amnhĩ jarẽnh anẽ? Nã mẽ ate ixtã apijaam kêt jakamã na pa ã mẽ amã amnhĩ jarẽnh anẽ. Mẽ kêp Kris nhỹ hã mẽ ajahkre xwỳnh ã amnhĩ to hêx xwỳnhjaja na ka htem ixrom kot amnhĩ to rũnh xwỳnh ã mẽ harẽ nẽ mẽ hã apijaam o ri apa. Nom ixte

amnhĩ to grire xwỳnh tã mẽ kot amnhĩ to rũnh o ijakrenh kêt. **12**Na pa pre mẽ akamã ri ixpa nê Tĩrtũm nhỹ hã aa mẽ ate mẽmoj pumunh kêt kwỳ ho anhỹr rax o ri mẽ akôt ixpa. Nê ỹ hã akupỹm mẽ à xwỳnhjê ho mex. Nê mẽ nohkre xwỳnhjê no ho mex. Na pa pre hte ã mẽ amã mẽmoj nhĩpêx anhỹr o ri mẽ akôt ixpa. Amnhĩ xà htỳx kamã ijamak o ri ixpa htã Tĩrtũm xihtỳx xà ho amnhĩ to htỳx nê ã mẽ amã mẽmoj to anhỹr o ri mẽ akôt ixpa. Mẽ ate omunh nê Tĩrtũm àhpumunh tỳx ã omunh kurê kumrêx kaxyw. Nê ixpê Kris nhỹ hã mẽ ajahkre hã ixpumunh kurê kumrêx kaxyw na pa pre ã mẽ amã amnhĩ nhĩpêx anhỹr o ri mẽ akôt ixpa. **13**Xàn pa pre nhãm krĩ hkwy kamã Kris kôt mẽ pahkwỳjê ho mex tã mẽ kajaja tanhmã mẽ ato mex to hkêt nê? Nà na pa pre hte mẽ anhĩpêx o axpẽn pyræk. ãm mẽmoj pixire na pa pre mẽ uræk nê mẽ awỳr kêt nê. Nhãm krĩ hkwy kamã ixpata ã na pa pre mẽmoj to presija nhũm prem inhmã òr o pa. Tã pa pre mẽ mỗ nê mẽ akôt ixpa nê mẽmoj to presija htã hã mẽ awỳr kêt nê. Kwa mẽ ã ixte amnhĩ jarênh anhỹrja ma nê ixkamã agryk kêt nê.

14Tã ot pa ra akupỹm mẽ awỳr inhnojarêt kaxyw. Na pa pre ra mẽ awỳr inhmôr o axkrut. Tã ra axte mẽ awỳr inhnojarêt kaxyw. Kot paj mẽ awỳr mỗ nê mẽ akôt ixpa nom te wam ixtêmta pyrà nê mẽmoj tã ri mẽ awỳr kêt nê. ãm mẽ amã ixkĩnh pix na inhmã hprãm. Mẽ apiitã te mẽ apê ixkra pyræk. Na hte mẽ hkrarejaja mẽ katorxà nê mẽ hipêêxà mã ujaarôr o pa hkêt nê. Mẽ hipêêxà nê mẽ katorxà na hte hkrare mã kot mẽmoj to presija xà hkôt kãm haprôr o pa nom mẽmoj tã hwỳr kêt nê. Ja pyrà nê kot paj mẽ apê ixkra pyræk ã mẽmoj tã mẽ awỳr kêt nê. **15**Kot kaj mẽ mẽmoj to presija japêr nê inhmã harê pa ixàmnhĩx ixkĩnh kãm mẽ amã ixkàxpore piitã òr par pyræk o amnhĩ nhĩpêx. Nê mẽ amã tanhmã amnhĩ nhĩpêx to ho ixpa rãhã ixtykja na inhmã hprãm. Inhmã mẽ akĩnh tỳx kumrêx tã mẽ kajaja mẽ amã ixkĩnhja mẽ atã hkwy jêt kêt kumrêx. **16**Ixte amnhĩ mã mẽmoj tã mẽ awỳr kêt tã na hte mẽ akwỳjaja ixêx rom ixte nhãm mẽ kêp amrakati xwỳnhjê mã kàxpore hã mẽ awỳr o ixpa hã ixkamnhĩx.

17Kwa tanhmã na pa pre ri mẽ ano kupyrr to? Xà ja kaxyw na pa pre mẽ awỳr ixkràmnhwỳta wa kumê? **18**Na pa pre Xitre hã ixihitỳx nê mẽ awỳr kumê. Nê Kris kôt mẽ pahtôja pa Xitre hkôt kumê nhũm wa ma mẽ awỳr mỗ. Tã xà na pre Xitre tanhmã mẽ ano kupyrr to? Nà na pre ã mẽ anhĩpêx anhỹr kêt nê. Tã wa ixte amnhĩ nhĩpêx nê wa ijamaxpêrja kot axpẽn pyræk. Nà na pa hte uræk nê mẽ ano kupyrr o ri ixpa hkêt nê. **19**Mãn ka mẽ axpẽn mã mẽ ijarênh o:

—Nà Pawre mẽ hkwyjaja mẽ kãm amnhĩ to rũnh xwỳnh prãm jakamã na ã Pawre kagàja kamã mẽ pamã amnhĩ tã àprãr anê.

Anhỹr o mẽ ijarênh japêr nom mẽ inhmã amnhĩ tã tanhmã ixàprãr to hprãm kêt. ãm mẽ inhmã mẽ akĩnh nê mẽ ato mex prãm jakamã na

pa htem tanhmã mẽ amã amnhĩ nhĩpêx to ho ri ixpa. Na pa Tirtũm noo mã Kris nhỹ hã ã mẽ amã mẽ amnhĩ jarênh anê.

20Tã kot paj jatã ma mẽ awỳr mō ka mẽ akwỳjaja tanhmã amnhĩ tomnuj to japêr.

Měmoj tã axpên mã axàkjêr o apa.

Rỳ mẽmoj tã axpên kãm agryk.

Rỳ axpên kãm agryk tokyx anhỹr o apa.

Rỳ axpên pê anhōxỳ.

Rỳ axpên to akapêr punuj o apa.

Rỳ mẽ ajakwa kamã nhãm mẽ hixi ho rêr o ri apa.

Rỳ amnhĩ to rũnh prãm xàj anhmã amnhĩ nhĩpêx to ho apa.

Kot kaj mẽ ã amnhĩ nhĩpêx anhỹr o ri apa pa ja hã mẽ apumu nê ixkaprĩ htỳx kumrêx ka mẽ tee ri amnhĩ tã ixpumu. 21Xà kot paj mẽ awỳr mō nê mẽ apumu ka mẽ akwỳjaja arĩ mẽ aprō kuhpa hã nhãm mênijê ho amnhĩkati ho ri apa? Rỳ arĩ tanhmã ajamaxpêr punuj to ho apa? Rỳ atỳx ri apijaàm kêt o apa? Kot ka mẽ arĩ ã amnhĩ nhĩpêx anê pa ja hã mẽ apumu nê ixkaprĩ xàj inhmỳr rax nê. Nê mẽ anhỹ hã Tirtũm noo mã ixpijaàm tỳx kumrêx.

Pawre kot tanhmã amnhĩ kukamã mẽ kãm karō hto

13 1Tirtũm kapêr ã kagà htũm tanhmã mẽ kot amnhĩ tomnuj to xwỳnhjê jarênh kot:

Koja mēhō tanhmã amnhĩ tomnuj to nhũm mēhō pyxi nê ã amnhĩ nhĩpêx anhỹr ã omu nê awỳr tē nē amã harē ka mẽ ama nē ãm ama nē hkôt ajamaxpêr kêt nē. No koja mẽmojaja axkrut rỳ axkrunēpxi nē hã omu nē awỳr mra nē axpên kôt amã harē ka mẽ ama nē mẽ hkôt ajamaxpêr kurê kumrêx. Anê.

Tã ra mẽ awỳr inhmōr o axkrut tã kot paj akupỹm mẽ awỳr mō nê mẽ apumu. 2Hapu hã mẽ awỳr inhmōrta ã na pa pre mẽ akwỳ kot tanhmã amnhĩ tomnuj to hã mẽ omu nê hã mẽ kãm akir nê mẽ kãm:

—Kot kaj mẽ amnhĩ tomnuj kaga nê tãm amnhĩ nhĩpêx kêt kot paj nhỹrmã akupỹn mẽ awỳr mō nê ã mẽ ate amnhĩ nhĩpêx anhỹr ã mẽ apumu nê hã mẽ atomnuj tỳx kumrêx kãm ga. Anê.

Jakamã kot paj mẽ ma mẽ awỳr mō nhũm mẽ akwỳjaja arĩ mẽ ate amnhĩ tomnuj o apa hã inhmã mẽ ajarē pa mẽ atã mẽ kuma nê tanhmã mẽ ato htỳx nê. 3Kot kaj mẽ ja hã ixpumu nê aprĩ hã ixte Kris nhỹ hã ixkapêr xwỳnh ã ixpumunh tỳx kurê kumrêx. Kris ixrom hihtỳx o hihtỳx. Na pre ra mẽ ate amnhĩ tomnuj o apata mỳrapê tanhmã mẽ anhĩpêx to. Tã kot kaj mẽ kormã ã ate amnhĩ nhĩpêx anhỹrja kaga hkêt hã koja tee ri ja hã mẽ apumu nê mẽ anhĩpêx kati nê. 4Amnepêm na pre Krisja te hihtỳx kêt pyrã nê ãm arĩ mẽ kãm xa nhũm mẽ unê nê pĩ kahpa ã kunhō

nẽ kupĩ. Tã nhũm Tĩrtũmja àhpumunh tỳx o akupỹm ho htĩr nhũm akupỹm htĩr o htĩr nẽ Tĩrtũm nhỹ hã hihtỳx o hihtỳx ã amnhĩ to amnhĩrit. Ja pyrã nẽ wam mẽ awỳr inhmõrta ã na pa pre hte mẽ akamã te Kris kormã htyk kêt ri hihtỳx kêêta pyrã nẽ mẽ akõt ixpa. Tã kot paj ma akupỹm mẽ awỳr mõ hãmri nẽ te Kris ra akupỹm htĩr nẽ hihtỳx o hihtỳxta pyrã nẽ Tĩrtũm xihtỳx xà ho tanhmã mẽ kot amnhĩ tomnuj xwỳnhjê nhĩpêx to. Hãmri nhũm mẽ amnhĩ tã ixpumu nẽ Tĩrtũm nhỹ hã ijamaxpêr tỳx ã ixpumunh kurê kumrêx.

5Kwa mẽ aprĩ hã tanhmã mẽ ate amnhĩ nhĩpêx to hã amnhĩ pumu. Xan ka htem ãm hãmri amnhĩ kaxyw Jejus Kris kõt ajamaxpêr o ri apa nã? Kot kaj mẽ apê hkwỹ hã koja mẽ akaxwỳnh kãm mẽ akamã hkrĩ rãhã nẽ. Nom koja mẽ akaxwỳnh kãm mẽ akamã hkrĩ hkêt ka mẽ ãm apê hkwỹ hã amnhĩ jarênh kaprỹ. 6No pa na ixte ja hã amnhĩ pumunh mex. Ixpê Jejus kwỳ na pa. Ra ixkamã hkrĩ nẽ ixkõt pa ho pa jakamã ixpê hkwỹ na pa. Tã mẽ ate ja hã ixpumunh mexja na inhmã hprãm. Na pa hte ixpê Jejus kwỳ hã amnhĩ jarênh kaprỹ hkêt nẽ.

7Nẽ na pa hte mẽ ato tanhmã Tĩrtũm wỳr to ho ri ixpa nẽ mẽ ato hwỳr o:

— Pa Tĩrtũm. Kwa tanhmã Korĩt nhõ xwỳnhjê hkrã hto kê mẽ tanhmã amnhĩ tomnuj to ho pa hkêt nẽ.

Anhỹr o mẽ ato kuwỳ. Mẽmo kaxyw na pa hte ã mẽ ato hwỳr anẽ? Ixte mẽ ajahkre mex ã amnhĩ to amnhĩrit kaxyw kêt. ãm mẽ ate amnhĩ to mex rãhã ho ri apa kaxyw. Kot kaj mẽ ã amnhĩ nhĩpêx anhỹr o ri apa hãmri nhũm axtem mẽhõ mẽ awỳr mõn pøj nẽ tanhmã mẽ amã mẽ ijarênh to nẽ mẽ ijarênh o:

— Kwa Pawre mẽ hkwỹjaja na htem Tĩrtũm kapêr kwỳm ri Korĩt nhõ xwỳnhjê jahkre ho pa.

Anhỹr tã pa amnhĩ tã mẽ kuma nẽ ãm mẽ kuma. 8Na pa hte Tĩrtũm kapêr kutã amnhĩ xunhwỳr kêt nẽ. Na pa hte ãm mẽ ate hkõt amnhĩ nhĩpêx o ri apa hã mẽ amã karõ kamã ixihitỳx rãhã ho ri mẽ akõt ixpa. 9Jakamã kot kaj mẽ hkõt amnhĩ nhĩpêx mex o apa pa ja hã mẽ apumu nẽ ixkĩnh nẽ. Mẽ kot axpên mã ixirerek ã ijarênh o pa htãã. ã mẽ ate amnhĩ nhĩpêx anhỹr o apa kaxyw na pa hte mẽ ato Tĩrtũm wỳr o ri ixpa nẽ kãm:

— Pa Tĩrtũm. Kwa tanhmã Korĩt nhõ xwỳnhjê hkrã hto kê mẽ kot amnhĩ tomnuj kaga hpa nẽ hpãnhã akapêr kõt pix mã mãn amnhĩ nhĩpêx rãhã nẽ. Anẽ.

10Tã pa kormã mẽ awỳr inhmõr xwỳj ri ã amnhĩ kukamã kagã nhĩpêx nẽ mẽnh anẽ. Mẽ ate kamã harênh nẽ mar nẽ tokyx akupỹm tãm amnhĩ nhĩpêx kaxyw. Kot pa mẽ awỳr mõ nẽ Pahihti nhỹ hã mẽ ate amnhĩ tomnuj ã mẽ amã akir. Nom inhmã ã mẽmoj tã mẽ amã ixàkjêr anhỹr prãm kêt. ãm ỹ hã kapêr o mẽ ajahkre mex nhũm mẽ ate inhmar nẽ hkõt amnhĩ nhĩpêx rãhã ho apaja na inhmã hprãm.

11E Kris kôt ixkwỳjaja. Ām ja pix. Kwa kêr ka mẽ ixkapěr mar tỳx nẽ hkôt amnhĩ nhĩpêx mex nẽ. Nẽ Tĩrtũm kôt pix mã ri tanhmã amnhĩ nhĩpêx to ho apa rãhã ho apa. Nẽ tãm ri amnhĩ nhĩpêx. Nẽ axpẽn kôt ajamakêtkati nẽ akĩnh nẽ axàmnhĩx ri apa. Kot kaj mẽ ã amnhĩ nhĩpêx anhỹr o apa nhũm Tĩrtũm mẽ akôt pa ho pa. Kãm mẽ pajapê htỳx kumrêx. Kêp mẽ pamã mẽ pahkĩnh nẽ mẽ pajamakêtkati jagjênh xwỳnh.

12-14Nẽ ota jar Kris kôt mẽ pahkwỳjaja pa mẽ ixpimràãtã mẽ awỳr ixpěr mẽ. Mẽ ixpiitã mẽ inhmã mẽ akĩnh tỳx jakamã na pa mẽ awỳr ixpěr mẽ.

Nẽ kê Pahihti Jejus Kris mẽmoj to mẽ akutã nojarêr rãhã ho pa. Nhũm Tĩrtũm arĩ kãm mẽ ajapê rãhã ho pa. Nhũm Karõ tanhmã mẽ akra hto ka mẽ axpẽn to mex pix kukamã mãn ajamaxpěr o apa.

Tã e ixkwỳjaja. Ām ja pix. Ixpê Pawre na pa mẽ awỳr kagàja nhĩpêx nẽ ã mênh anẽ.